

EL SANTO EVANGELIO SEGÚN SAN MARCOS

Juan el Bautista predica en el desierto

1 I fūjcuá nar bbede na i xijquijú te bi dyoti car Jesucristo, cár Ttú ca Ocja.

2 Ya má yabbú ca hnár jmandardero ca Ocja ca mí tsjifi ur Isaías bi jñux pü jár libro ter beh ca di ncja bbú xti hñecua jar jöy cár Ttú ca Ocja. Bi má ncjahua car profeta:

Bi man car Tzi Ta jitzi, bi xih cár Ttú:

“Nuya gu pejni hnam jmandardero da hmeto, Da jojqui car hñu pü jabu grí ma, cja nuquigüe, xquí hmefa.”

3 Dyójmajú, i dyo hnár cjahni pü jabu jin to i hñani, i ndo ña nzajqui,

I xih cü pé dda cjahni da jojqui quí vidajú, como ya xpa eh cam Tzi Jmujú.

I nzojmú ncjahua, ina: “Gui jojquijú ya car hñu pü jabu xtu eh ca Ocja,

Guí cjajpijú drá ncjuani.”

Bbú mí man yü palabra-yü car profeta, mí má ja di ncja car Juan.

4 Cja bi zudi como ngu gá man

car profeta. Car Juan mí nzoh cü cjahni, cja mí xitzi. Mí dyo pü jabu jin te mí jø ngu. Mí xih cü cjahni di jiejmú ca rá nttzo ca mí ɔtijú cja di xixtjeju. Nubbú, car Tzi Ta jitzi di perdonabiju ca xquí dyotiju. 5 Göhtjo cü cjahni cü mí bbuh pü jar estado Judea, co cü mí bbuh pü jar jñini Jerusalén, mí pönijú, mír möjmu jabu már bbuh car Juan. Cja mí ncjuantsjeju, xquí dyotiju ca rá nttzo. Nu car Juan bi xix pü jar datje Jordán.

6 Cü dajtu cü mí je car Juan, xquí ttóte digue quí xi cü camello, cja mí nguti hnár nguti gá xifani. Mí tza ttaxi, cja mí tzijpi cár ttafi cü colimena cü mbí cä pü jar ttø.

7 Guegue mí nzoh cü cjahni, mí xijmu: —Ya xpa eh hnár hñojø ca i ndo hñohui cár ttzedi ca Ocja. Más i ndo pehtzi cár ttzedi ni ndra nguejquigö. Nugö, jin dár ntzögöbbe gu cja úr muzo guegue, pa gu cjajpi jmandardado. 8 Dí xixquitjoju cor deje. Nu ca hnaa ca ba eje, du penquijú car Espíritu Santo pa gu yojmú-ca.—

El bautismo de Jesús

9 Cja bbú ya xquí müh car Juan mí nzoh cü cjahni cja mí xitzi, car

Jesús bi bøm pø jar jñini Nazaret pø jar estado Galilea, bi ma gá ma pø jabø mår bbøh car Juan, cja nucá bi xitzi jar datje Jordán. ¹⁰Nu car Jesús, bbø mí bøx pø jar dejø, bi jianti car jítzi bú xogui, cja cár tzi Espíritu ca Ocja bú cah pø ncja hnar tzi paloma, bi zøh pø xøtze pø jabø mår bbø guegue. ¹¹Cja bi nigui hnar jñä mbí ñä pø jar jitzi, mí ma:
—Nuquigue, üm tzi Ttøqui, dí mahqui. Guí pojpigui nüm tzi møy.—

Tentación de Jesús

¹²Diguebbø ya, cár tzi Espíritu ca Ocja bi xih car Jesús mí nestø di ma hnar lugar pø jabø jin to mí hñani.
¹³Cja car Jesús bi ma bú hmuh pø cuarenta mpa cja cuarenta xuy. Ddatsje mår bbøh pø, cja bú eh car Satanás, bi dyøtibi prueba, mí ne di jiöti pa di dyøti tema cosa jin di tzø. Mår bbøh pø hneje cù dda züwe cù mí tzajte, cù mbí cä jar ttøø. Nu quí ángèle ca Ocja bi móx car Jesús, bi cjakpi jmandido.

Jesús comienza su trabajo en Galilea

¹⁴Diguebbø ya, car Juan ca mí xix cù cjakni bi cjoti födi, cja car Jesús bi wem pø jar lugar-ca, pé bi ma gá ngoh pø jar estado Galilea. Mbá xih cù cjakni ja ncja ga mandado ca Ocja. ¹⁵Mí ma:

—Ya xí nzuh car pa. Ya xta mudi xta mandado ca Ocja hua jar jöy. Nuquigueju, gui jiejmø ca rá nttozo cja gui hñemeju nñr tzi jogui jñä nu dí xihquijø pa gui tötiø car nzajqui ca rí hñé jitzi.—

Jesús llama a cuatro pescadores

¹⁶Diguebbø ya, car Jesús bi ma gá hñø pø hnanguadi car mar, pø

jar estado Galilea. Má dyo pø cja bi ccahti yojo hñøjø cù mí ncjuadø. Ca hnaa mûr Simón, cja ca pé hnaa mûr Andrés. Nucø, mår pøtihui cár hmamöyhui jar dejø, como mí mamöyhui. ¹⁷Car Jesús bi xifi, inqø:

—Nuquiguehui, gui tenguihui ya, gu möjö. Ncja ngø guir pamöyhui, nugø gu cjakqui gui jionihui cjakni, cja gu tzihui pa da denguigö.—

¹⁸Cja gueguehui ngueticø bi jieh cár hmamöyhui, bi möjmu car Jesús.

¹⁹Nu car Jesús pé bi tjoj nù rá tzi cjanø, pé bi ccahti pe yojo hñøjø cù mí ncjuadø, car Jacobo co car Juan. Nucø, mí ttuhui car Zebedeo. Gueguehui mår cù pø jar barco, mår yojmø cár tahui, mår tuhtihui quí hmamöyju pø jabø xquí xegui. ²⁰Cja car Jesús ya bi nzofo, bi xifi di denihui. Diguebbø ya, gueguehui bi möjmu car Jesús. Bi zojmi cár tahui, mûr Zebedeo, mår juhui quí mefi jar barco.

Un hombre que tenía un espíritu malo

²¹Diguebbø ya, car Jesús co cù hñøjø cù xquí denijø, bi zønijø jar jñini Capernaum. Cja bi möjmu pø jár templo cù judio, car pa ca mí tzøyajø, cja car Jesús bi ujti cù cjakni cár palabra ca Ocja. ²²Nu cù cjakni cù bi dyøde, bi ndo hñø í møyju, como car Jesús mår ndo zö mîr ujti. Mí ccahtijø, guegue mí pødi ntjumøy te i man cár palabra ca Ocja. Nu cù maestro cù mí ja cár cargoju pa di ujti cù cjakni cár palabra ca Ocja, jin tza ntjumøy mîr bødijø. ²³Car pa-cá, mår bbøh pø jar templo hnar hñøjø ca mí

hñohui hnár ndají ca Jin Gui Tzö. Car hñøjø-ca, bbü mí jianti car Jesús, bi ndo mafi nzajqui,²⁴ bi xifi:
—¿Te dí cjahquije, nuque, Jesús, gúr mìngü Nazaret? ¿Cja ya xquir hñejé gui cujquije pü jabü jin gui tzö? Dí padi toquigue. Nuquigue, gúr Cristo, xí hñixqui ca Ocja pa gui mandado, cja xpá mènquiaue.

²⁵Nu car Jesús bi huenti ca hnár ndají ca Jin Gui Tzö, bi xifi:

—¡Cohti ir ne, cja gui wembi nur hñøjø-nu!—

²⁶Diguebbü ya, cár ndají ca Jin Gui Tzö bi dyenti car hñøjø, bi cjajpi bi ndo juq, bi mbuntzi jar jöy. Nubbü, bi cjajpi car cjahni bi mafi nzajqui. Cja diguebbü ya, bi wembi car hñøjø, bi zogui. ²⁷Cja göhtjo cu cjahni cu már ccahtiq, bi ntzujü, bi hño í mayü, cja bi hñontsejü:

—¿Ja i ncja-nu? ¿Tema ddadyo palabra ba ja nur Jesús? Guegue-nu i ndo ja cár cargo. I bbejpi quí ndají ca Jin Gui Tzö, cja nucü, i ójte.—

²⁸Cja bi ndo fadi ja ncja xquí fongui car ttzondají car Jesús. Göhtjo cu cjahni cu mí bbü pü jar estado Galilea co hñeh cu mí bbü cu pe dda lugar cerca pü, nguetica bi dyódejü ter beh cä xquí dyóti guegue.

Jesús sana a la suegra de Simón Pedro

²⁹Diguebbü ya car Jesús co car Jacobo co car Juan bi bñoniju jár templo cu judío. Bi ma gá möjmu jár nguhui car Simón co car Andrés.

³⁰Cár too car Simón mí jñini, már bbentjo, mí caxi pa. Cja nguetica bi tsjih car Jesús te mí cja guegue.

³¹Nu car Jesús bi guati jabü már

bbeni, bi zetibi cár dye, bi xotzi. Cja nguetica bi wen car pa, cja bi joh car bbeyña. Nubbü, bi nantzi, bi jojquibi cu cjahni te bi zijü.

Jesús sana a muchos enfermos

³²Diguebbü ya, car nde-cá, bbü ya xi már cuj nur jiadi, cu cjahni bú tzí cu döhtji co cu cjahni cu xquí zah cu ndají cu jin gui tzö, bi guatiju pü jabü már bbü car Jesús. ³³Göhtjo cu mìngü car jñini-cá bi ndü jár goxtji car ngü pü jabü már bbü car Jesús. ³⁴Cja guegue bi jojqui cu döhtji, cja bi fongui göhtjo cu ttzondají, cja jí mí jegui di ñajü, como mí meyajü to guegue. Már ngü cu cjahni cu bi jojqui car Jesús.

Jesús predica en Galilea

³⁵Car jiax ya cä, car Jesús bi nantzi ndo nxuditjo, bbü jim be mí nigui. Bi bñoni gá ma hnar lugar pü jabü jin to mí hñani, bú tzi dé pü, bú nzoh ca Ocja. ³⁶Diguebbü ya, car Simón bi bñoni hñejé, má hñohui pe dda cjahni, bi ma bú jonijü car Jesús. ³⁷Cja bbü mí dötijü, bi xifi:

—Ya xná jonquijü göhtjo cu cjahni.—

³⁸Nu car Jesús bi xih quí möxte:

—Mój ya yü tzi jñini nu rá cjanü hñejé, pa gu xih cu cjahni nur tzi jogui jñä. Guejná um bbefigö-nú.—

³⁹Nubbü, car Jesús bi hño pü jar estado Galilea, bi ddatzi göhtjo cu tzi jñini, bi nñuti mbo quí templo, pü jabü mí jmuntzi cu cjahni, cja bi ujti cár palabra ca Ocja. Cja bbü mí ntjehui cjahni cu xquí zah cár ndají ca Jin Gui Tzö, bi huenti-cá, bi fongui.

Jesús sana a un enfermo leproso

⁴⁰Ca hnajpa, hnar hñøjø ca mí tzöhui car jñini lepra bi guati

pu jabu már bbuh car Jesús, bi ndandlínajmu, cja bi xifi:

—Bbu guí ne gui cjagui car favor, gui joguigui tzu.—

⁴¹Car Jesús bi juijqui, bbu, bi tangui úr dyé, bi dön car hñojø, cja bi xifi:

—Dyo ya ca. Gu joquiqui. Nuya, gui zö.—

⁴²Cja bbu ya xquí ma nur palabra-nu, nguetica bi zö car hñojø. ⁴³Nu car Jesús ya bi xifi di ma ntzedi, bi hñimbi:

⁴⁴—Gui ndo jñña úr huenda, jin gui ma gui ngóxte ter beh ca xí ncja. Gui ma bú jon cu zuwe cu i mam pu jar ley i nesta gui ñahtibi ca Ocja, cja gui tzix pu jabu i bbuh car möcja, gui dö, pa da bböhti cja da jñahtibi ca Ocja. Guejjo gui ujti car möcja nir cuerpo pa da ccahti, ya xcú zö. Nubbu, pé gu coji, cja da ccajtiqui yu cjahni, ya xí joquiqui ca Ocja.— Ncajapu gá man car Jesús.

⁴⁵Bi ma car hñojø, bbu, pe ndejma bi ngóxte rá ngu, bi pura bi xih cu cjahni te xquí dyoti car Jesús. Eso, göhtjo pu jabu mí pa car Jesús, mí ndo ten cu cjahni, mí ndo du, cja car Jesús, ya jí mí ne di ñuti cu jñini, como jí mí ne pa di ndu cu cjahni pu jabu mí dyo. Eso, mí tohmitjo pu jabu jin te mí jo ngu, cja ndejma mbá ndo hñe cu cjahni, mbá joniju guegue.

Jesús sana a un paralítico

2 Diguebbu ya, bbu ya xquí tzi cja mpa, car Jesús pé bi ma gá ngo jar jñini Capernaum. Cja bi ttode, pé xquí zom pár ngu, ²Nubbu, bi jmuntzi cjahni rá ngu, bi nduju car ngu, hasta ya jí mí tzo

to di ñuti jar goxtji. Nu car Jesús bi ujti cu cjahni cár palabra ca Ocja. ³Diguebbu ya, bú eh cu dda cjahni, mbá tziju hnar döhtji, jí mí tzo di hñani, mbá ncjuniu gojo quí hñohui. ⁴Nucu, jí mí tzo di guatiju jabu már bbuh car Jesús, como xquí ndo ndu cu cjahni, eso, bi xohtziju hna pedazo car ñajcu, xotze pu jabu már bbu guegue. Mí guadi mí xohtziju ya, bi tsjöhmju car döhtji, göhtjo co cár mfidi, gá nzøh pu jabu már bbuh car Jesús. ⁵Nu car Jesús, bbu mí ccahti cu cjahni-cú, bi bädi, mí emebiju. Nubbu, bi xih car döhtji ca jí mí tzo di hñani:

—Nuquigues, um ttuqui, dí xihqui, ya xí mperdonau*qui* ca rá nttzo ca xcú dyote.—

⁶Cja már ju pu cu dda maestro cu mí ujti cu cjahni car ley. Nucu, bi dyo nur palabra nu bi man car Jesús, cja bi zohmiju, mí mantsjeju:

⁷—¿Dyocu i má ncjapu nur hñojø-ná? Jin gui tzo nur palabra xí má. I ne da cjatsje ca Ocja. ¿Toca i ja cár cargo pa da perdonabi yu cjahni ca rá nttzo ca i ótiju? Ddatsje ca Ocja.— ⁸Nu car Jesús bi bädi ter bbeh ca már mben cu maestro, cja bi xijmu:

—¿Dyocu guí tzobiguiu mbo ir mayju? ⁹Nugo xí ttajqui cam ttzedi, eso, dí pehtzi derecho gu xij nur hñojø nu jin gui tzo da hñani: “Dí perdonau*qui* ca rá nttzo ca xcú dyote.” Guejjo i jñejijo bbu gu xifi: “Bböy, gui xox quer mfidi, cja gui hño.” ¹⁰Pe xtu xij nur palabra nu xtu xifi pa gui padiju, cierto dí ja cam cargo hua jar jöy pa gu perdonabi ca rá nttzo ca xí dyoti yu cjahni, como guejcö dür cjahni xpá bbenqui hua jar jöy.—

Diguebbu ya car Jesús bi nzoh car hñøjø ca jí mí tzö di hñani, bi hñina:

¹¹—Nuquigue, dí xihqui ya, bbøy, gui xox quer mfidí, cja qui me ir ngu.—

¹²Cja car hñøjø ca mûr döhijima bi bbö nttzedi, bi xox cár mfidi, bi bøni. Göhtjo cü cjahni bi ccahti gá mbøni, már zö mîr hño. Cja bi hño í muyju, bi majmu:

—iTe tza rá nzeh ca Ocja! iJabu xtá nuju hnar cosa di jñejmi ná!—

Jesús llama a Leví

¹³Diguebbu ya, car Jesús pe bi ma gá ma jar nengui zabi. Cja bú e cjahni rá ngu, bi guati jabu már bbu, cja car Jesús bi ujti cár palabra ca Ocja. ¹⁴Nubbú, bi ma gá ma pé hnanguadi, bi ccahti hnar hñøjø, már ju pu jabu már nccuti cü contribución. Guegue mí ju cár tjuju mûr Leví, mûr ttu car Alfeo. Cja car Jesús bi xifi:

—Gui tengui ya, gu me.—

Mí dyoj ya-nu car Leví, bi bbö nttzedi, bi mehui car Jesús.

¹⁵Ca pe hnajpa ya, car Jesús már bbuh pu jár ngu car Leví, már ju pu jar mexa yojmi quí möxte, már tziju. Guejtjo már juhui guegue rá ngu cü jojte cjahni cü mí cobra cü contribución, co pe dda cjahni cü mí ndujpite, como göhtjo tema cjahni mí ten car Jesús, már ndo nguju. ¹⁶Nu cü maestro cü mí ujti cü cjahni car ley, co cü dda fariseo, bi ccahtiju car Jesús már tzihui cü cjahni cü mí cobra cü contribución, hneh cü pe dda cjahni cü mí ndujpite. Guegueju bi dyön quí möxte car Jesús, bi hñinaju:

—¿Dyocá i tzihui yu ttzocjahni nir maestro? Yu to i tzihui, jiøjte cjahni-yú, co yu pe dda yu i ndujpite.—

¹⁷Bi dyoj nur palabra-nú car Jesús cja bi dädi:

—Cu cjahni cü jin te i cja, jin gui nesta médico. Nu yu i jñini, i nesta medico-yú. Nugö, jí xtá ejcö pa gua nzoy yu cjahni yu i ma, jin te i tu. Xtá eje pa gu nzoy yu cjahni yu i paði xí dyoti ca rá nttzo. Dí ne gu fôx-yú.—

Le preguntan a Jesús sobre el ayuno

¹⁸Ca hnajpa, quí möxte car Juan cü mí ujti guegue co guejti cü cjahni cü mí teniju cü fariseo már ayunaju. Cja bú eh cü dda cjahni pu jabu már bbuh car Jesús, bi majmu:

—Rá pa ya i ayunaju quí möxte car Juan, co hnëh cü i ten cü fariseo. Xi yir möxtegue, ¿dyocá jin gui ayunaju hneje?—

¹⁹Nu car Jesús bi däh bbu:

—Bbu i cja ntajtti, ¿cja i ayunaju cü cjahni cü i tzöju car mbaxcjua? Jina. Menta i bbu jtti pu car novio cja i cjadi car mbaxcjua, jin gui tzö da ayunaju. ²⁰Hasta bbu ya xtrú ma car novio, nubbú da jogui da ayuna yu cjahni. Ya xpa eh car pa bbu jin da ddöjqui hua. Nubbú, da ayuna yum amigo yu i tengui. Pe jin gui jogui da ayuna yu pa ya.

²¹Ncadipu hneje, jí rí ntzöhui gui cah hnar zedatu, grí pøhtibi hna pedazo ur ddadyo datu. Bbu gui cjajpi-ca, da nguqui ca xí xeh car zedatu, hnanguadi pu jabu xí bbøhte. ²²Guejtjo jí rí ntzöhui gui cah hnar zexfani, grí xiti cár jugo cü uva pa da ixqui pu. Bbu gui

dyøti-ca, cár jñä car vino da xejqui cù zexfani, cja guejto da mfön car vino. Göhtjo da bbedi, bbü. Nesta gui jioni xifani rá zö pa gui xiti cár jugo cù uva.—

Yu palabra yu bi män car Jesús, bi jequi cù costumbre cù mí ten cù judio co hnar zedatü o hnar zexfani. Nu cù palabra cù mí mä guegue, bi jequi hnar cosa ddadyotjo cja rá nzedi.

Los discípulos recogen trigo en el día de descanso

²³Ca hnajpa, car Jesús má dyohui quí möxte, má tjojmü já juattay. Mûr pa ca mí tzöya cù judio, cja bbü má dyoju, quí möxte bi mädi bi dñjqui ñattay pa di zaju. ²⁴Nu cù fariseo bi ccahtijü ya, cja bi xijmu car Jesús:

—¿Dyocä i tamí ttey yir möxte? Jin gui tzö nu i ötiju nar pa na dí tzöyaju.—

²⁵Nu car Jesús bi dädi:

—Jin gui ntzto ca i ötiju, como i nesta da ziju. Nuquejü, ¿cja jin guí ccahtiguejü te i mäm pü jar Escritura? ¿Cja jin guí padijü ter beh cä bi dyøti car David bbü mí tuntjü, guegue co hnëh cù hñøjö cù mí hñohui, bbü jin te mí pehtzi pa di ziju? ²⁶Cù pa-cü, mí mandado car dämöcjä Abiatar, cja car David bi ñuti pü jár ngü ca Ocja, bi gux cù tjumé mär ntzuni, cù xquí jñahtibi ca Ocja, bi zi, cja guejto bi un cù cjahni cù mí hñohui. Nu cù tjumé-cü, jin gui tjegui to da zi, jøndi cù möcjä.— Bi ma ncjapü car Jesús.

²⁷Cja pé bi mä guegue:

—Ca Ocja bi dyøti nar pa na dí tzöyaju pa da hmü rá zö yu cjahni. Jin gá dyøti nar pa gá ntzöya jøntjo pa di mandadobi yu cjahni da zujpijü nar pa. ²⁸Nugö dür cjahni xpä bbenqui hua jar jöy, eso dí pehtzigö derecho gu mandado te da ttøti nar pa na rá ntzujpi.—

El hombre de la mano seca

3 Car Jesús pé bi guati pü hnár templo cù judio, pü jabü mí jmuntzi cù cjahnitjo. Már bbü pü hnar hñøjö, xquí dyoti ca hnár dye. ²Cja már bbü pü hneje cù dda fariseo, mär axju car Jesús, pa drí badijü, icja di jojqui döhtji car pa ca mí tzöyaju? Como mí joni te di jiøxju. ³Nu car Jesús bi nzoh car hñøjö ca xquí dyoti ca hnár dye, bi hñimbi:

—Gui bböj ya, gui hmöh madé.—

⁴Diguebbü ya, guegue bi dyön cù fariseo cù már bbü pü:

—¿Ter beh cä i tjeguijü gu ötiju nar pa gá ntzöya? ¿Cja i tjeguijü gu föxju hnar cjahni? ¿Cja huá más bí jogui gu øhtibijü ca rá ntzto, jin gu föxiju? ¿Cja da jogui gu tapijü cár vida, cja huá gu jeguijü da dñ?—

Nu cù fariseo, jin te gá ndädiju.

⁵Diguebbü ya, car Jesús bi ccahti, ndejmä jí mí ne cù fariseo di jie guegue di möx car hñøjö-ca, como jin te mí pehtzijü ttijqui. Eso, bi zöti ár mhä cja bi ungui ur dumhä. Diguebbü ya bi xih car hñøjö:

—Tängui quer dye.—

Cja car hñøjö bi tängui cár dye, cja bi hna jogui. ⁶Bbü mí ccahtijü-ca, cù fariseo bi bönijü, bi ma bú ñahui cù dda cjahni cù mí tsjifi herodista, pa di mföxju di möhtijü guegue.

Mucha gente a la orilla del lago

⁷ Nu car Jesús bi mehui quí möxte, bi ma gá ma jár nttzāni car mar Galilea, cja bi dení hnar ndo jmundo cü cjahni, xcuí hñejmu cü tzi jñini pü jar estado-cá, cerca pü jar mar. ⁸Cja bbü mí dyødejü, mí ndo øti milagro car Jesús, bú hñe cjahni rá ngü, bú ejmu pü Judea, co pü Jerusalén, co pü Idumea. Bú ejmu nü rí ncjanü car datje Jordán, co pü jabü rá bbüh cü jñini Tiro co Sidón. Mbá ejmu göhtjo cü lugar-cü, mí jonijü car Jesús, cja bi ndo ndüjü. ⁹Nu car Jesús bi xih quí möxte di mehtzi listo hnar tzi barco pü jabü di ñati guegue, pa jin di dñhti cü cjahni. ¹⁰Car Jesús xquí jojqui dñhti rá ngü, eso bú hñe cü cjahni cü mí tzöjü göhtjo tema jñini, mí ne di guatijü car Jesús cja di dñijü, pa di ccuhtzibijü ca mí tzöjü. Cja bi ndo dñtijü. ¹¹Nu cü cjahni cü xquí züh quí ndajü ca Jin Gui Tzö, bbü mí ccahtijü car Jesús, cü ttzondajü mí cjapí-cá mí ndandíñajmu pü jabü már bbü guegue, cja mí majmu nzajqui, mí inaju:

—Nuquigue, úr Ttuequi ca Ocjä.—
¹²Nu car Jesús mí ccahtzi nttzedi cü ttzondajü pa jin di góx cü cjahni to guegue.

Jesús escoge a los doce apóstoles

¹³Diguebbü ya car Jesús bi box pü jar ttøø, mí ddatsje. Cja bbü mbü cay, nubbü, bi nzoh cü hñojø cü mí ne di hñitzi gá möxte, cja nucü, bi guatijü. ¹⁴Digue cü cjahni rá ngü cü mí tení, car Jesús bi juajni doce, bi hñix-cü pa di ujti cár palabra ca

Ocjä, cja pa di guy, di má drí xih cü cjahni. ¹⁵Car Jesús guejjo bi un quí möxte cár cargojü pa di jojqui dñhti cja pa di fongui quí ndajü ca Jin Gui Jo. ¹⁶Gue ya doce hñojø-ya bi juajni car Jesús cja bi un cár cargojü: Bi juajni car Simón, cja pé bi jñuhtibi pé hnar tjuju, mür Pedro. ¹⁷Guejjo bi juajni car Jacobo ca mür ttü car Zebedeo, co car Juan ca mür cjuadä car Jacobo. Yü yojo-yü, car Jesús pé bi jñuhtibi cár tjujuhui, mür Boanerges. Nur tjuju-nü i ne da ma, már ndo nzeh quí jñahui, ncja ngü bbü i ñuntzi. ¹⁸Guejjo bi juajni car Andrés, car Felipe, car Bartolomé, car Mateo, car Tomás, car Jacobo ca mür ttü car Alfeo, car Tadeo, cja co car Simón ca mí ten cü cjahni cü mí tsjifi cananista. ¹⁹Guejjo bi juajni car Judas Iscariote ca bi dö guegue. Car Jesús bi hñix yü doce hñojø-yü gá möxte, cja bi un cár cargojü.

Acusan a Jesús de tener el poder del demonio

Diguebbü ya, car Jesús pé bú eh pü jar jñini Capernaum. Mí yojmi quí möxte, cja bi ñutijü jar ngü pü jabü mí cuatijü. ²⁰Cja pé bi guati cjahni rá ndo ngü, pé bi ndüjü. Göhtjo úr pa mí dñü jar ngü, nim pa mí unijü tiempo gueguejü di ziju. ²¹Ma ya, bi dyøh cár familia car Jesús, ya xquí zom pü jar ngü pü jabü mí cuati. Nubbü, bú ejmu pa di zixju. Como mí man cár familia car Jesús, guegue-ca xquí bbeh cár may, xquí nloco.

²²Cja már bbüh pü Capernaum cü dda maestro cü mí ujti cü cjahni car ley. Xcuí hñejmu Jerusalén, cja mí majmu:

—Nur hñøjø na i tsjifi ur Jesús, xí nzah cár jefe cu ndaji jin gui jo, gue car Beelzebú. Guegue-ca i mandadobi cu pe dda ndaji cu jin gui jo, cja xí un nur Jesús cár ttzedi pa da fongui-cu.—

²³Nu car Jesús bi dyoj nur palabra nu mí man cu maestro-cu. Bi nzojm̄ cu cja bi xijmu, jí mí tzö ca mí mbeniju. Bi nzofo gá bbede, bi xijmu ncjahua:

—¿Cja guí inajh, car Satanás da ne da fongui cu pé dda ndaji cu i mandadobi? Jin da ne. ²⁴Bbu i bbuh hnár gobierno hnár jñini, cja göhtjo cu cjahni pu da ntujnihui car gobierno, jin da dé car gobierno-ca. Da mfongui. ²⁵Guejtjo hneje, bbu i bbuh hnár familia ca i ntujnitsjeju, cja da jogui da ntzixiju car familia-cá? ¿Cja jin da mfonti? ²⁶Ncicapu hneje car Satanás, bbu di fongui quí hñohui cu i øhtibi quí jmandido, cja jin di mpun cár cargo, bbu? Ngueticá di tjegue.

²⁷Bbu i bbuh hnár hñøjø rá nzedi, cto da ñuti pu jár ngu pa da gñiquibi quí mejti? Jøntsjetjo bbu di bbu pé hnaa más drá nzedi, guegue-ca bbeto da dapi car mingu, da duhtibi quí dye, cja diguebbu ya da jogui da gñiquibi quí mejti.

²⁸Guí dyojmaju nar palabra na dí xihquiju ya: I bbuh car manera pa da mperdonabi yu cjahni göhtjo cu cosa rá nttzo cu i øtiju, cja co cu palabra rá nttzo cu i majmu. ²⁹Nu yu cjahni yu i ccøhtiju yu cosa rá zö yu dí øte por digue car Espíritu Santo, cja i majmu, gue ca Jin Gui Jo i øti-yu, jin gui tzö da mperdonabi yu cjahni-yu. Nuyá, ncjahmu xí xijmu ca Ocja, guegue

Jin Gui Jo. Da dñudiju ca rá nttzo ca xí dyotiju, göhtjo ur tiempo, nim pa jabu da bóm pu jár castigoju.—

³⁰Bi mä ncicapu car Jesús, porque mí man cu dda maestro: “Nur Jesús i yojmi cár ndaji ca Jin Gui Jo. Guehcä i föx-cá.”

La madre y los hermanos de Jesús

³¹Diguebbu ya, bú eh quí cjuada car Jesús co cár me pu jabu már bbuh guegue. Bi hmöjtiju pu tji car ngu, bi nzojniju. ³²Nu car Jesús már ju pu mbo car ngu, cja mí itjü madé cu cjahni cu már ujti. Cja bi tsjih car Jesús:

—Tji nir me cja co yir cjuada bí nzohqui hua tji.—

³³Nu car Jesús bi dädi:

—¿Cja guí padiju to cu dí xifi um megö o um cjuadagö?—

³⁴Bbu mí mä nur nttöni-nu, car Jesús bi ccøhti cu cjahni cu már ju pu jár ngu, cja pé bi xijmu:

—Ccøhtijmaju nñum megö co yum cjuadagö. ³⁵Yu cjahni yu i øti ca i ne ca Ocja, ncjahmu um cjuadagö-yu, ncjahmu um ncjügö-yu, ncjahmu um megö-nu hneje.—

El ejemplo del sembrador

4 Ca pe hnár pa, car Jesús már bbuh pu jár nttzani car mar, pé már ujti cu cjahni. Bi ndo jmuntzi cjahni rá ngu. Como mí ndo dñu, car Jesús bi ñuti hnár tzi barco ca mí o pu jár nttzani car dejé, nu cu cjahni rá ngu bi gojiti pu jár nengui car mar, bi hmöjtiju jar jöy. ²Diguebbu ya, car Jesús bi mudi bi ujti cu cjahni cár palabra ca Ocja. Bi xijmu ejemplo rá ngu. Ncicapu gá nzofo. Bi xih cu cjahni:

³—Guí dyødeju nár bbede-nú: Mí bbuh hnar hñøjø, bi bóni bi mongui ttey. ⁴Cu dda ttey cu bi moni bi jiøh pü hnanguadi car hñu. Bú eh cu ttzuntzu, bi za cu ttey-cu. ⁵Cu pe dda ttey ya, bi jiøh pü jabu jin te mí bbon car jöy. Bi jiøh pü jabu mí bbuh cu ndo medo már nxidi. Cja nguetica bi bøx cu ttey-cu, como mí ujtjo jabu már je car jöy. ⁶Bbu mí bøx car jiadi, bi zati cu ttey-cu, bi dyoti, como mí ujtjo quí dyu.

⁷Cja cu pe dda ttey ya, bi jiøh pü jabu mí bbon quí ndö cu hmini. Bi te cu hmíni bi gohmi cu ttey, ya jin te gá ñu cu ttey. ⁸Cja cu pe dda ttey ya, bi jiøh pü jar jogui jöy. Bi bøtze, bi te, bi ñu rá zö cu ttey-cu. Cu dda bi ndu treinta tzi ttey cada hnar tzi ñattley, cja pe dda bi ndu sesenta tzi ttey cada hnar tzi ñattley, cja cu pé dda ttey ya, bi ndu hasta hna ciento tzi ttey cada hnar tzi ñattley.—

⁹Bi guadi bi man nár bbede-nú car Jesús, cja pé bi xih cu cjahni: —Yú to i bbuj yí gu, da dyøde te i ne da ma nár bbede-nú.—

El propósito de los ejemplos

¹⁰Cja bbu ya xquí wen cu cjahni rá ngu, cu tengüdi cu xquí døhmi, már bbubi car Jesús cja co cu doce hñøjø cu mí ntzixihui, cja guegueju bi dyönijü car Jesús, te mí ne di man car bbede digue cu ttey cu bi bboni. ¹¹Cja bi däh car Jesús:

—Nuquejü, xí ttahquijü ur tsjejqui qui paðijü ja ncja ga mandado ca Ocja, como guehuejü xí juanquijü ca Ocja pa da ttujtiquijü ja i ncja. Nu cu pe dda cjahni, jin gui ttungui ur tsjejqui da ntiendeju ja ncja ga

mandado guegue. ¹²Guegueju, macja i ccähti yu dí øte, pe jin gui jajü ur huenda ja i ncja. I øj yu palabra yu dí ma, pe jin gui øjmu te i ne da ma. Cu cjahni-cu, dí nzofo gá bbede, pa jin da pöti quí mfeniju. Bbu di pöti quí mfeniju cja di jieimu ca rá nttzo, nubbá ca Ocja di perdonabiju ca rá nttzo ca xí dyøtiju.—

Jesús explica el ejemplo del sembrador

¹³Cja car Jesús pé bi xih quí möxte:

—¿Cja jin guí pajmu te i ne da ma nár bbede-ná? Bbu jinä, ¿ja grí pajmu te i ma góhtjo cu dda bbede, bbu? ¹⁴Nár bbede cu ttey, car monttey i jñejmi car cjahni ca i xih quí minga-cjahnijü nár palabra ca Ocja. ¹⁵Nu cu ttey cu bi jiøh pü hnanguadi car hñu, gue cu cjahni cu xí dyødeju cár palabra ca Ocja, pe jí xcá ntiendeju ja i ncja. Nucá, bbu ya xí dyødeju, nguetica bú eh car Satanás, hnë bi jñahtzibi car palabra ca xí dyødeju, ya jin gui mbenijü ja i ncja. ¹⁶Nu cu ttey cu bi jiøh pü jabu már bbon cu ndo medo, gue cu cjahni cu bi dyøh cár palabra ca Ocja, cja bi mpöjmu, bi cuajtijü nttzedi. ¹⁷Cu cjahni-cu, i jñejmi cu ttey cu jin te i bbuh quí dyu. Chi tchtjo ga déju, pe diguebbu ya, bbu xta uju yu pe dda cjahni, o bbu xta ttøhtibi tujni por rá ngue cár palabra ca Ocja, nguetica da dyuxi ur mayju. Ya jin da ne da denijü bbu. ¹⁸Nu cu ttey cu bi jiøh pü jabu mí cja quí ndö cu hmini, gue cu cjahni cu i øh cár palabra ca Ocja, ¹⁹pe rí ma ur mayju nár vida hua jar jöy co cu

cosa rá ngu cü i jonijü. I mbenijü, bbü di cjajü rico, di mpöjmü, bbü; eso, i ungui úr møyju pa da ngujqui ca te i pehtzijü. Cü cjahni-cü, jin tza i cjajpi ngüenda cár palabra ca Ocja. Gue cü pe dda cosa hua jar jöy i ndo nejü. Eso, car palabra ca xí dyødejü i coji ncja ngu hnär huattey ca jin te i cü semilla. Xí te cü hmjni, xí ngohmi cü ttey. Jin te xcá joh-cü. ²⁰Nu cü ttey cü bi bbom pü jar jogui jöy, gue cü cjahni cü i øh cár palabra ca Ocja cja i eme göhtjo mbo úr møy. Cü cjahni-cü, jin gui jejmu cár palabra, cja i øtijü ncja ngu ga ma. I jñejmi cü ñatttey cü i tu rá ngu semilla. Cü ddaa i tu treinta tzi ttey cada hnär ñatttey. Cü ddaa i tu sesenta tzi ttey cada hnaa, cja cü pé ddaa i tu hasta cien tzi ttey cada hnaa.—

El ejemplo de la lámpara

²¹Diguebbü ya car Jesús pé bi xih quí möxte:

—¿Te i cjajpi yü cjahni hnär lámpara? ¿Cja i tjé pa da göti pü mbo hnär cajón o gue pü jöy car gama? Jína, i ttix pü ñä pü jabü da yoti göhtjo nur ngu. Ncjapü hneje yüm palabra yü dí xihquijü. ²²Yü pa yá, tzi yotjo yü cjahni i padi te i ne da ma, pe ba eh car pa bbü xta tsjifi göhtjo yü cjahni. Nugö xtú xihquijü gá bbede, pa jí bbe da fadi te i ne da ma, hasta bbü xtu eh car pa bbü xtrí ntzöhui da fadi. ²³Yü to i bbüj yí gu, da dyøde te i ne da man yü palabra-yü.—

²⁴Car Jesús guejtjo bi xih quí möxte:

—Nuquejü, ya xquí tzi ødejü. Gui jñuhpjü ndumøy yü palabra yü dí

xihquijü. Bbü gui dyembi ir møyju pa gui padijü ja i ncja, da möxquijü ca Ocja, pa más drá zö gui padijü, cja pé da ddahquijü jogui mfeni pa gui padijü más drá ngu. ²⁵Nur cjahni nü i juhipi ndumøy ca tengü ca ya xqui padi, da badi más drá ngu. Nu car cjahni ca jin te i cjajpi ca chi tchutjo ca ya xí dyøde, da dabenitjo, ya jin da badi ni digue-ca.—

El ejemplo de la semilla que crece

²⁶Car Jesús pé bi xih quí möxte:

—Gu xihquijü pé hnär bbede pa gui padijü ja ncja ga nigui cár jmandado ca Ocja hua jar jöy. I ngujqui ncja ngu ga te car semilla ca i tuh hnär hñøjø pü jár juaji.

²⁷Bbü ya xí tuju, diguebbü ya car hñøjø i pa úr ngu, i jejti car semilla tengü mpa. Cada bbü nxuy ga dyoy, cja cada bbü nxudi ga nantzi.

I töhmi hasta bbü ya xí fóx car semilla. Nu car hñøjø jin gui padi ja ncja xcá fótze. ²⁸Guejtsje nur jöy i cjajpi i fóx car semilla. Hnajpa ngu hnajpa ga té car planta. Bbeto i fóx nur tzi tjä. Diguebbü ya i te, cja i xoti car dñaxi. Ma ya da ncja car manxja, cja da nojqui car semilla.

²⁹Cja bbü ya xí meh cü tjä, nubbü da bøn yü cjahni du xofo, como ya xí nzøh car pá bbü xta tsjongui. Da ncjapü hneje da nigui ja ncja ga mandado ca Ocja hua jar jöy.—

El ejemplo de la semilla de mostaza

³⁰Cja car Jesús pé bi ma pé hnär bbede, bi xih quí möxte:

—Pé gu ddahquijü hnär ejemplo pa gui padijü ja ncja drí ngujqui cár jmandado ca Ocja hua jar jöy. ³¹I

ncjá ncja ngu hnár ndö ʉr murtaza ca i bboni jar jöy. Car tzi ndö-cá, nttzeditjo chi tchʉ. Más chi tchʉ ni ndra ngue cʉ pe dda semilla cʉ i bboni.³² Pe bbʉ ya xí bboni, i fótze, i te rá nte. I tapi göhtjo cʉ dda ccani cʉ i jø jar juají. I pøh quí dye, i majqui, eso ba eh cʉ tzi ttzuntzʉ, i tzöya pʉ jár xumʉy.—

El uso que Jesús hacía de los ejemplos

³³Cja car Jesús bi segue bi ujti cʉ cjahni gá bbede. Mí xijmʉ pé dda bbede cʉ mí jñejimi-yá. Ddahtzʉ nguá ujti, hasta pʉ jabʉ mí ccahti, ya jin di ntiente cʉ cjahni bbʉ pé di xijmʉ pé ddaa.³⁴ Göhtjo ca te mí ujti cʉ cjahni rá ngu, bi xifi gá bbede. Jin gá nzojtjo. Nu quí möxte, car Jesús bi nzoh-cʉ, bi xifi göhtjo ja mí ncja.

Jesús calma el viento y las olas

³⁵Guejti car pa-cá, bbʉ ya xquínde, car Jesús bi xih quí möxte:

—Möjö, grá ddaxjʉ nʉ pé hnanguadi nur mar.—

³⁶Diguebbʉ ya, quí möxte car Jesús bi hñih cʉ cjahni rá ngu cʉ xquí deni cja bi ñutjʉ jar barco pʉ jabʉ már jʉ car Jesús. Pé már bbʉh pʉ pé dda tzi barcotjo. Cja bi möjmʉ bbá, bi hñ car barco jar dejé.³⁷ Diguebbʉ ya bi mʉdi bi hñ car hnar ndo ndají. Mí ndo en car dejé, már ndo nte, hasta mí mföhrtzi pʉ mbo car barco. Ya xti ñutzi, di cjajpi di ñay.³⁸ Nu car Jesús má ɻah pʉ jár xicji car barco, xquí góx cár ña hnar ntjuxiñā. Quí amigo bi dyójʉ cja bi xijmʉ:

—iTzó ya, maestro! ¿Cja jin guí cja ndumʉy gu cjañije dejé?—

³⁹Mí dyoj ya-cá, car Jesús bi nantzi, bi huëhti car ndají cja bi xih car dejé:

—iJuigui, dyo guí hñáni!—

Cja bi hna tzöya car ndají, bbá. Bi jui nttzedi car ndají co car dejé.

⁴⁰Diguebbʉ ya, car Jesús bi xih quí möxte:

—¿Dyoca guí ndo ntzujʉ? ¿Dyoca jin guí emeguijʉ?—

⁴¹Gueguejʉ ya, bi ntzujʉ rá ngu, cja bi hñ quí mfenijʉ, bi majmʉ:

—To nar hñojø-ná? iNttzeditjo rá nzedi! Hasta nur ndají co nur dejé xí hñemebi ca xí ma.—

El hombre endemoniado de Gadara

5 Cja diguebbʉ ya, bbʉ ya xquí ddaxjʉ car mar, car Jesús co quí möxte cʉ mí ntzixihui bi zotjʉ ca pé hnar lado, pʉ jar jöy ca mí tsjifi Gadara.² Bbʉ mí bøm pʉ jar barco car Jesús, ngueticq bi ccahti hnar hñojø, ya xi mbá ejé di ntjehui. Mbá pøh pʉ cʉ tzi ngu pʉ jabʉ mí cjöti cʉ ánima. Car hñojø-ca, xquí bbeh cár mfeni, xquí zʉh cʉ dda ndají cʉ jin gui tzö.³ Cja mí tøhmi pʉ jabʉ mí cjöti cʉ ánima. Már ndo nzedi. Jí mí bbʉh ca to di jiöti di duhti.⁴ Como ya xquí ndo hnuytibi quí dye hnëh quí hua co cadena. Nu guegue, xquí ccuquitjo cʉ dda cadena, cja nu cʉ ddáa, xquí ntzegui.

Jin to mí bbʉh drá nzedi pa di dapi car hñojø-cá.⁵ Göhtjo ʉr pa ʉr xuy mí dyo já ttøø, co hnëh pʉ jabʉ mí bbʉh quí ngu cʉ ánima. Mí mafi, mí jentsje cár ngø co medo már tzi njo.⁶ Car hñojø-cá, bbʉ mí jianti ya xi mbá eh car Jesús, bú cju ʉr ddiji, hne bi ndandíñajmʉ, bi ndane car Jesús.

⁷ Bi mafi nzajqui, bi xih car Jesús:

—¿Te guír hñejcua, nuque Jesús? úr ttuqui ca Ocja ca bí bbuh pü ña, mbo jar jitzi. Dí öhqui, gui hñih ca Ocja gá testigo, pa jin gui ungui.—

⁸Bi mä ncjapü car hñojø, como car Jesús xquí huenti cár ndají ca Jin Gui Jo, xquí xifi:

—Nuquigue, gúr ttzondají jin gui tzöquigue, gui pöni cja gui jieñ nñr hñojø-ná.—

⁹Cja car Jesús pé bi dyön car ttzondají ca xquí züh car hñojø, bi hñimbí:

—¿Te úr ju quer tjuju?—

Cja bi däh-cá:

—Cam tjujugö úr Ejército, como ránnguuije.—

¹⁰Cja car ndají ca jin gui jo bi ndo ttzin car Jesús, bi dyöipi jin di fongui pa drí ma pü jabü jin gui tzö. ¹¹Car Jesús co car hñojø mär bbuejcia, cja mär bbuej nü rá cjanü hnare ttøø. Nü hnanguadi car ttøø má dyo hnare ndo partida cü zacjua, mär ñuni. ¹²Nu cü ttzondají cü xquí züh car hñojø, bi dyöipi úr tsjejqui car Jesús, inajü:

—Gui cujquiye gu möjme nü rá cjanü, grá cütije mbo í mayu yü zacjua.—

¹³Cja car Jesús bi ungui úr tsjejqui. Nubbü, bi bøn cü jin gui tzö, bi ma gá ñuti jáy mayu cü zacjua. Cja car partida cü zacjua, göhtjo bi gü úr ddiji, bi ddagui. Bi má bù ndojmu jár ña car tzi ttøø, bù töguijü, bi jiøjü jar deje. Már ndo ngü cü zacjua, mí bbay como yo mil, cja bù cjátiyü mbo car deje, bù tujü pü.

¹⁴Diguebbü ya, cü cjahni cü mär föh cü zacjua bi züjü, bi ddaguijü, bi ma bù ngöxejü jar jñini hnëh

pü ja juaji. Cja cü cjahni bù ejmu nttzedi, bi ccahtijü ter beh cä xquí ncja. ¹⁵Diguebbü ya bù ejmu pü jabü már bbuh car Jesús. Bi ccahtijü car hñojø ca xquí yojmähui cü ttzondají rá ngü. Guegue-cá ya xi már jüdi pü hnanguadi car Jesús, ya xi mí je quí dajtü, ya xcuí goh cár may. Nu cü cjahni cü xcuí hñejmu, bbü mí ccahtijü car hñojø ca mür loco jmaja, bi ndo zuju. ¹⁶Bi wenijü pü, bi ma bù cökjü cü pé ddáa cü cja mbá eje. Bi xih-cü te xquí ncjajpi car hñojø ca xquí züh cü ttzondají rá ngü, cja hneje te xquí ncjajpi cü zacjua. ¹⁷Diguebbü ya cü mingü pü, bi mudi bi ttzin car Jesús di wem pü jár jöy gueguejü.

¹⁸Cja car Jesús bi ñuti jar barco, bi ma. Nu car hñojø ca xquí züh quí ndají ca Jin Gui Jo, bi ndo dyöipi favor car Jesús di ungui úr tsjejqui di ñutihui jar barco, di deni. ¹⁹Nu car Jesús jin gá jiegui. Bi xifi:

—Me ir ngü, cja gui xih quir mingüjü te tza ngü cár jmajte ca Ocja, como guegue-cá xí juiquiqui cja xí joquiqui.—

²⁰Nubbü, bi ma car hñojø, bi ma guí ngöxté pü jar lugar ca mí tsifi Decápolis. Bi xih cü cjahni te tza mär zö car milagro xquí dyöti car Jesús, cja co ja ncja xquí cohtzibi quí mfeni. Cja göhtjo cü cjahni cü bi dyödejü, bi ndo hño í mayüjü.

La hija de Jairo, y la mujer que tocó la ropa de Jesús

²¹Diguebbü ya, car Jesús pé bi ddax car mar, pé bi zöti pü ca hnanguadi. Nubbü, bi jmuntzi rá ndo ngü cü cjahni. Bi guati pü jabü

már bbuh car Jesús, pa jar nengui mar. ²²Cja bú eh hnar hñojø ca mí mandado pa jár templo cu judio. Mí ju cár tjuju mûr Jairo. Guegue-ca bi guati car Jesús, cja bi ndandiñajmú pa jáy hua. ²³Cja bi ndo dyöipi favor di ma tzu pa jár ngu. Bi xifi: —Ya xná tu cam tzi ttixu. Gu me tzu, gui dyux quir dye pa da zö, da hmuy.—

²⁴Nubbá, car Jesús bi mehui guegue, cja má teni hnar ndo jmundo cu cjahni, má ndo dñu jar hñu. ²⁵Guejtjo már bbuh pa hnar bbejñä ca mí jñini, mí yojmi cu cjahni rá ngu cu má ten car Jesús. Guegue xquí tzöhui doce cjeya ca mír xoti cji. ²⁶Xquí ndo sufri, xquí ndo ddax cu médico rá ngu. Pe jin te mí jogui, cja ya xquí ttzoni göhtjo cár domi. Ya jin te mí ja, cja mír ngujquitjo cár jñini. ²⁷Car bbejñä-cá, bbu mí dyöde te mí man cu cjahni digue car Jesús, bi jioni, bi guati pa jár xutja madé cu cjahni rá ngu, cja bi zetibi cár dajtu. ²⁸Como mí mantsje mbo úr may: “Bbu gu tjömbitjo nár dajtu nu i je nür Jesús, gu zö.” ²⁹Cja bbu mí zetibi cár dajtu, ngueticá bi tzoya ca mír xoti cji, cja bi badi, ya xquí wen cár jñini. ³⁰Nu car Jesús ngueticá bi badi, por rá ngue cár ttzedi guegue, xquí zö hnar döhtji.

Cja bi bböti, bi dyön quí möxte cu mí hñohui:

—¿Tocá xí zetigui num dajtu?—

³¹Nu quí möxte bi dadi, bi hñimbij:

—¿Cja jin guí ccahti yu cjahni rá ndo ngu, xí nguahqui, hasta i ndo nttzixjü? ¿Ja ncja güi tzö bbu to di dönqui, bbu?—

³²Nu car Jesús bi bböti, bi ccahti göhtjo cu cjahni cu már bbuh pa cerca, pa di badi toca xquí dyøhtibi-ca, cja bi ccahti car bbejñä. ³³Mí pañ car bbejñä, gue car Jesús xquí jñajquibi cár jñini, pe mí tzu, hasta mí juá. Nubbá, bi guati cja bi ndandiñajmú pa jáy hua car Jesús, bi ncujuani, bi xifi göhtjo te xquí ncja. ³⁴Cja car Jesús bi xifi:

—Nuque um ttixuqui, guehcä xquí hñemegui, xcú zö. Gui má ya rá zö, da jñu ir tzi may. Ya jim pé da yojpi quer jñini.—

³⁵Bbu már ñadi guegue, bú eh cu dda cjahni, xcuí hñeh pa jár ngu car hñojø ca mí mandado pa jár templo cu judio, cja bi xijmu-cá:

—Ya xí ndu quer tzi ttixu. Jiej nür maestro-yá. Hmeditjo guí ne gui tzix pa ir ngu.—

³⁶Nu car Jesús jin gá cjajpi ncaso ca mí man-cá. Guegue bi xih car hñojø ca mí ja cár cargo:

—Dyo guí ntzu. Gui hñemetjojo.— Diguebbu ya bi mehui.

³⁷Car Jesús jin gá jieh cu cjahni rá ngu di dengui úr xutja. Bi zix car Pedro co car Jacobo co car Juan ca mí ncjuadahui car Jacobo, jñña-cá.

³⁸Cja bi zotiju pa jár ngu car hñojø ca mí ja cár cargo pa jár templo cu judio. Car Jesús bi ccahti cu cjahni rá ngu cu xquí jmuntzi pa, cja bi dyöde, már ndo huettzoniju cja már ndo jijü car á anima. ³⁹Nu guegue bi ñuti car ngu cja bi xih cu cjahni:

—¿Dyoca gár majmu cja gár zoniju? Nür tzi bbejñä jin gui tu. Dí ccahtigö ncjahmu rá ati-nú.—

⁴⁰Nu cu cjahni cu már bbuh pa bi deniju bbu, como mí padijü, cierto ya xquí du car bajtzi. Cja car Jesús

bi fongui göhtjo-cú, cja bi zix cár ta car bajtzi, co cár me, co hnēh cù jñū quí möxte cù xquí deni. Bi ma gá ñutijù ca hnar cuarto pù jabù mår bben car bajtzi bbejñà. ⁴¹Diguebbù ya car Jesús bi zetibi cár dye cja bi nzofo gá hebreo, como guehcá mí ñà guegueju-cá. Bi xih car bajtzi bbejñà:

—Talita cumi.— Nar palabra-na i ne da mä: Nantzi ya chju.

⁴²Car hora ca bi nzofo, exque bi nantzi car tzi bbejñà, mí pehtzi doce año. Nu cù cjahni cù bi ccahtijù bi ndo hño úr møyjù cja bi zujù rá ngù. ⁴³Nu car Jesús bi ccax cù mingù pù, ntzeditjo bi xih cù cjahni jin to di ngöxté. Cja pé bi xijmu di unijù te di zi car tzi bajtzi bbejñà.

Jesús en Nazaret

6 Diguebbù ya car Jesús bi bóm pù, pé gá ma jár jöy guegue, cja bi den quí möxte. ²Cja bbù mí zoh car pa ca mí tzöyajù, car Jesús bi ma jar templo, bi mudi bi ujti cù cjahni rá ngù cù xquí mpejni pù. Cja bbù mí dyøh cù cjahni te mí män car Jesús, bi ndo hño í møyjù cja bi majmu:

—¿Ja xcá mbaj nür hñøjø-nù yù palabra yù i xijquijù? ¿Jabù guá hñej nür jogui mfeni i pehtzi ya-nú? ¿Jabù xí nxödi da dyøti milagro?

³Cja jin gui gue nür yaxi-ná, nür ttù car María, nür cjuada car Jacobo co car José co car Judas, co car Simón? ¿Cja jin gui bbùjcua nùm jñinijù quí ncju hneje? iNgue! i bbùjcua göhtjo-cu.—

Cù mingù Nazaret mí majmu ncjapù, como jí mí ne di hñemejù,

cja güí hñeh ca Ocja car Jesús?

⁴Nu car Jesús bi dädi:

—Jin gui ttihetzibì yí jmmandaderò ca Ocja pù jabù minguyù. Jin gui ttihetzibì pù jár ngù, pù jabù i bbùh cár ta, co cár me. Nu cù cjahni cù rá bbùh pù pé dda lugar, nucú da hñihtzibì-cá.— ⁵Como jí mí ttihetzibì car Jesús pù Nazaret, causa, jin tza mí ngù cù milagro bi dyøti pù. Bi jojqui tengüdi cù döhtji, bi dyux quí dye, cja guegue bi wen cù jñini cù mí tzöyù. ⁶Nu car Jesús, bi ndo hño úr møy, dyoca jí mí ne di hñeme quí mingù. Diguebbù ya, bi bóni gá ma cù pé dda tzi jñini cù mår nzötítjohui car Nazaret, cja bi xih cù cjahni cár palabra ca Ocja.

Jesús manda a los discípulos a predicar

⁷Diguebbù ya, car Jesús bi nzoh cù doce hñøjø cù mí ntzixihui. Bi xifi di bónijù di ma gá yoho, drí hñojù göhtjo cù tzi jñini. Cja bi un cár cargojù, pù jabù di ntjehui cjahni cù xquí zu ttzondajì, di fonguibí-cá. ⁸Bi xijmu jin te di jñaxjù jar hñù, jöntsje hnar tøjø. Jin di duxjù hnar bbeni ur dajtu, jin di ma di guxjù tjujme, cja jin di jmuntzi domi pa di jñaxjù jar hñù. ⁹Bi xijmu di dihtijù zextji tjojo cja jin di fíhtzi cár pötijù. ¹⁰Car Jesús guejtjo bi xih quí möxte:

—Bbù gui tzotijù hnar jñini cja gui cutijù hnar ngù, gui hmäjtijù pù hasta car pa bbù xquí pönijù car jñini-cá. ¹¹Cja bbù i bbùh hnar jñini pù jabù jin da ne da cuajtiquijù cù cjahni, cja jin da ne da dyøh car palabra ca gui xijmu, bbù xtí pönijù jar lugar-ca, gui jojmijù cù jöy cù di

tu quir huaju, pa da bah cu mingu pu, ya jim pé gu cojmu pu, como jin gui tzö ca xí dyojiquiju. Certo dí xihiq*uij*u, cu mingu car jñini Sodoma co car jñini Gomorra da ttuni hnar castigo drá ngu bbu xtu eh ca Ocja pa da juzga yu cjahni. Nu cu mingu pu jabu da mfonguiquiju, más drá ndo ngutsje cár castigo ca da ttun-cu, hasta jin da jiötiju.—

¹²Cja bbu ya xquí guah car Jesús, xquí nzoh quí möxte, bi bon-cu, bi ddaxju rá ngu lugar, bi nzojmu cu cjahni. Bi xijmu di jiejmu ca rá nttozo cja di jioniju ca Ocja. ¹³Cja bi jojqui rá ngu cjahni cu xquí nloco, xquí zuh cár ndaji ca Jin Gui Tzö. Guejtjo bi xoxi döh*ti* rá ngu. Mí coxi hna tzi tuq*ui* ur aste, cja bi zö-cu.

La muerte de Juan el Bautista

¹⁴Nubbu, bi dyoh car rey Herodes te mí man cu cjahni digue car Jesús, como mí ndo ntangui ca mí ñoti-ca. Cja bi man car Herodes:

—Gue car Juan ca mí xix yu cjahni, ya pe xqui dyo. Masque bi du, pe nuya pé xí jña úr jña, eso, i ndo ñoti milagro rá nzedi.—

¹⁵Cja mí bbuh cu dda cjahni cu mí majmu:

—Gue nur profeta Elías nu i ndo ñoti milagro.—

Cja pé mí bbuh cu dda cu mí majmu:

—Guejti nur Jesús ur profeta hneje, eso, i ñoti milagro. I jñejmi cu profeta cu mí bbuh mahmeto.—

¹⁶Nu car Herodes ndejma mí mbeni:

—Gue car Juan ca dú mandado bi tjequibi cár dyuga. Cja nuya pé xí jña úr jña, ya pé xqui bbujtjo.—

¹⁷Guegue car Herodes xquí cuajti cár bbejpo, xquí hmujtsjhui. Nucá, mí ju cár tjuju mûr Herodías, mûr bbejña car Felipe, cár cjuada car Herodes. Car Juan bi huenti car Herodes por rá nguehca xquí yohti bbejña, eso, car Herodes bi mandado di ttzuh car Juan cja di cjoti födi. ¹⁸Como car Juan xquí xih car Herodes:

—Jin gui tzö ca pé xcú cuajtib*i* cár bbejña quer cjuada, pé xcú cjap*i* ir bbejña. ur hmetzö-ca.—

¹⁹Eso, car bbejña-ca mí ndo uhui car Juan, mí ne di mandado di bböhti. Nu car rey Herodes bi ccahtzi, jin gá jiegui di möhti.

²⁰Como car Herodes ndejma mí ihtzib*i* car Juan. Mí padi jin te mí tu-ca cja mí pejpi ca Ocja. Eso, mí ntu pa te di cjap*i* car Juan. Guejtjo bi ccax cár bbejña pa jin te di cjap*i*. Guegue mí gusta di dyoh ca mí man car Juan, macja mí yomfeni íja ncja di jogui di dyoti ca mí man-cá? ²¹Pe ndejma bi zoh car pa ca mí tohmi car Herodías, como nucá mí joni ja drí möhti car Juan. Bi zoh car pa bi tzo cár cumpleaños car Herodes. Guegue-cá bi dyoti hnar mbaxcjua cja bi nzojni cu hñojø cu mí fóx cár jmandado, co cu jefe cu mí mandadobi cu sundado, co cu pe dda hñojø cu mí ja úr cargou pu jar estado Galilea. ²²Bbu mí ttoti car mbaxcjua, cár ttixu car Herodías bi ñuti pu jabu már bbuh cu cjahni, bi ni, cja bi ndo tzoh car Herodes co cu pe dda cjahni cu már tzihui guegue. Nubbu, car rey bi mahti car bajtzi bbejña cja bi xifi:

—Nuque chju, rá ndo zö gri ni.
¿Tema regalo guí ne gu ddahqui?

23Dí ih ca Ocja, ca te gui dyöjqui, xtá ddahqui, hasta madé nür jöy nu dí mandado gá rey.—

24Diguebbu ya, car bajtzi bbejñá bi bøni, bi ma bú cöx cár me, cja bi dyöni:

—¿Ter beh cä gu öjpi?—

Cár me ya bi dädi:

—Dyöjpi cár ñä car Juan ca mí xix yu cjahni.—

25Cja nguetica car bajtzi bbejñá bú coh pü jabu már bbuh car rey, cja bi xifi:

—Dí negö ya da ttzejquibi cár ñä car Juan ca mí xix yu cjahni, da cjöti hnar moji cja du dde hua.—

26Bbu mí dyoj ya-ca car Herodes, bi ungui ur dumuy, pe ndejmä bi mandado di ttun car bajtzi bbejñá ca mí ödi. Como xquí hñih ca Ocja gá testigo, guejto por rá ngue cu cjahni cu már ju pü, már ccahtijü te di ncja, jí mí jogui di góombi car bajtzi bbejñä ca xquí dyödi. **27**Eso, car Herodes nguetica bi nzoh hna cu sundado, bi guy di ma du jampi cár ñä car Juan. **28**Cja car sundado bi ma gá ma jar födi, bú tzejquibi cár dyuga car Juan, bú cöhtibi cár ñä hnar moji, cja pé bú tje, bi un car bajtzi bbejñä. Cja guegue-ca pé bi un cár me.

29Diguebbu ya bi dyöh quí möxte car Juan te xquí ncja. Bi möjmä pü jar födi, bú tuju cár cuerpo car Juan, bú cötijü pü jár ngu gá ánima.

Jesús da de comer a cinco mil hombres

30Diguebbu ya, bú cojmä quí möxte car Jesús cu xquí bøniju xquí tñunguijü car tzi jogui jñä. Bú ejmä bi mpejniju car Jesús cja bi xi

guegue jabu xcuí zonijü, co ja ncja xcuí ujti cu cjahni cja co göhtjo ca xcuí dyotijü pü. **31**Nu car Jesús bi xijmu:

—Möj ya, dá möh pü jabu jin to i hñani, gu ma tzöyajü tzü pü.—

Mí ma ncjahua, como már ndo ngu cu cjahni cu mí joniju car Jesús. Xní ma cu ddaa, ya pé xi mbá eh cu ddaa. Cja gueguejü, ni mpa mí ttungui tiempo pa di ziju. **32**Eso, bi mehui quí möxte bi ñutijü hnar barco, gá möjmä ca pé hnanguadi car mar, pü jabu jin te mí bbu jñini. **33**Nu cu cjahni már jantijü, cja bi meyajü to cu xquí ñutijü jar barco. Nubbu, bi möjmä, bi cojtitjojü jár nttzani car deje, má teniju car barco pü jabu má pa. Már ngu cjahni, míngüjü cu tzi jñinitjo cu mí bbu jár nttzani car mar, bi bøniju pa di ma du ntjhui car Jesús. Bbeto bi zoti cu cjahni, cja bbu mí zoti pü car Jesús, ya xi már tóhmi-cá. **34**Nu car Jesús, bbu mbú cah pü jar barco, bi ccahti cu cjahni már ndo du, cja bi juijqui, como mí ncrajü ncja ngu yu tzi dëti bba jin te i bbuh cár mödijü. Cja bi mudi bi ujti cu cjahni rá ngu mfeni digue cár palabra ca Ocja. **35**Cja bbu ya xquí nde, quí amigo car Jesús bi guati, bi xijmu:

—ujto jin te i bbu denda hua jabu dí bbupjü. Ncjá ya, ya xí nde.

36Gui cuh tzü ya yu cjahni da ma já rancho co já tzi jñini nu rá cjanü pa du töñiju tjujime, como ujto te da ziju hua.—

37Nu car Jesús bi dädi:

—Nuquiguejü, gui uniju te da zi-yü.—

Nu quí möxte pé bi xijmu:

—¿Cja da jogui gu möjme, gu má töjme tjujmé rá ngu, da myhui yo ciento cu domi, pa gu unije da zi-yu?—

³⁸Cja bi daj ya car Jesús:

—Tengu tjujmé guí pehtzijú hua? Gui möjmu ya, bù ccahtijú.—

Cja bi möjmu bù hñönijú, bbú. Diguebbú ya, pé bù cojmú bi xijmu car Jesús:

—Jöndi cutta tjujmé co yojo tzi möy.—

³⁹Ma ya, car Jesús bi xih quí möxte di bbejpi cu cjahni rá ngu di wegue gá grupo cja di mih pü ja tzi ccangui paxi. ⁴⁰Nubbá, bi wejque gá grupo cu cjahni. Cu dda grupo mí pehtzijú hna ciento cjahni. Nu cu pé dda grupo, mí pehtzijú cincuentatjo. Göhtjo bi mipjú jöy. ⁴¹Diguebbú ya car Jesús bi penti cu cutta tjujmé co cu yojo möy. Bi nøhtzi jitzi, bi dyöjpi ca Ocia di bendeci. Nubbá, bi xejqui cu tjujmé cja bi uni quí möxte pa di jequibi cu cjahni, di zi-cá. Cja bi ncjadipu cu yojo tzi möy, bi jequibi göhtjo cu cjahni. ⁴²Nubbá, göhtjo cu cjahni bi ziju, cja bi ñiñajú.

⁴³Diguebbú ya, quí amigo car Jesús bi jmuntzijú cu tzi pedazo cu tjujmé co cu tzi pedazo cu möy cu xquí sobra, bi ñuhtzijú doce cu bbøtze.

⁴⁴Mí cutta mil cu hñøjø cu bi zi cu tjujmé, aparte cu bbejñá co cu bajtzi.

Jesús camina sobre el agua

⁴⁵Diguebbú ya car Jesús bi xih quí möxte di hmetoju di ddax car mar, di möjmu ca hnar jñini mír hmuh ca pé hnanguadi car dejé. Car jñini-cá mí tsjifi Betsaida. Eso,

bi ñatijú car barco, bi möjmu, cja guegue car Jesús bi xih cu cjahni di möjmu í nguju. ⁴⁶Cja bbú ya xquí wen cu cjahni, car Jesús bi bøx pü jar ttø, pa drí nzoh ca Ocia pü.

⁴⁷Bbú ya xquí nxuy rá zö, car barco pü jabu má pa quí amigo car Jesús má dyo jar madé car zabi, nu car Jesús már ddatsje pü jar jöy. ⁴⁸Cja guegue bi jianti quí möxte, ya xquí ndo mbo úr cueju, como mír dempi jár jmijú car ndaji, mbá cohtzitjojo car barco pü jabu xcuí hñeje. Cja bbú mí bbeh tzu pa di nigui, car Jesús bi hñó xotze car dejé. Mír ma du tzuh quí möxte pü jabu má pa car barco. ⁴⁹Nucú, bbú mí jiantijú car Jesús má dyo xotze car dejé, bi hñinajú, mür pijte, cja bi ndo majmu nzajqui. ⁵⁰Göhtjo bi jantijú, cja bi ndo zuju rá ngu. Nu car Jesús ya, xní nzofo bi xijmu:

—Da jñu ir møyju ya. Guejquigö. Dyo guí ntzuju.—

⁵¹Diguebbú ya bi bøx car Jesús, bi ñuti jar barco pü jabu má pa quí möxte. Nubbá, bi hna tzoya car ndaji. Cja quí möxte, bi ndo hñó í møyju, ⁵²como jí mí ntiendeju ja mí ncja car Jesús, masque xquí ccahtijú te bi cjajpi cu tjujmé, pe ndejmá jin gá ntiendeju, te tza már nzeh car Jesús, como már medí quí møyju.

Jesús sana a los enfermos en Genesaret

⁵³Diguebbú ya, bi ddaxju car mar, bi zonijú ca pé hnanguadi car dejé, nu jar jöy nu mí tsjifi Genesaret. Bi datiju car barco, cja bi bønijú jar jöy. ⁵⁴Cja cu cjahni cu mí bbuh pü, ngueticá bi meyajú car Jesús.

55Cja bbu mí fadi, ya xi már bbuh pu car Jesús, bú cuju ur ddiji göhtjo cu míngu pu, co cu míngu cu pe dda tzi jñiñi cu már nzótihi pu jar mar. Bi mpeguiju bú tzi quí döhtjiju. Cu ddaa cu jí mí tzö di hño, bú tudiju co göhtjo quí mfidi. Göhtjo bú cuatiju pu jabu már bbuh car Jesús. **56**Göhtjo pu jabu mí pa car Jesús, ncja ngu já ciudad, ncja ngu já tzi jñiñitjo, ncja ngu já rancho, mbá hñe cu cjahni, mbá cuatiju car Jesús. Mbá tzi quí döhtjiju, mí peh pu já töy cja co já hñu, pa bbu xti tjoh pu car Jesús, di dyopipju favor di jiejmu di dömbiju cár nttzaní cár dajtu. Cja göhtjo cu to bi döniju, bi zö-cá.

Lo que hace impuro al hombre

7 Diguebbu ya, bú eh cu dda fariseo, bi guatiju car Jesús. Mbá yojmu cu maestro cu mí ujti cu cjahni car ley. Cu fariseo co cu maestro xcuí hñejmu Jerusalén. **2**Guegueju bi ccahtiju cu dda quí möxte car Jesús, már tziju tjujme. Pe nucá, jí xcá xüdyeju ncja ngu nguá xüdye cu fariseo. Eso, bi zohmiju-cá. **3**Como cu fariseo co göhtjo cu ddáa cu mí tendiju cár religión cu judio, mí teniju costumbre cu xquí zoh quí titaju, masque jí mí cuati jar Escritura cu costumbre-cá. Nu cu fariseo co cu pé ddáa cu mí teniju-cá, mí ndo xüdyeju rá ngu ante que di ziju. Mí majmu, mí nesta di nxüjqui rá ngu vez pa di goji limpio, ncjapu di tzøh ca Ocja, como mí inaju, már nttzo cu cjahni rá ngu cu xcuí ntjehui pu jar töy. **4**Cja bbu mbá cojmu jár töy, mí nxajmu, cja bbu jina, jin di ziju.

Guejjo mí teniju pé dda costumbre rá ngu, mí majmu, i ne ca Ocja gu ñtiju ncjapu. Mí xüti göhtjo quí traste según quí mandamientoju pa jin di contibi quí tzi muyju. Dé mí xüti quí vaso co quí xaro, co quí traste gá xittegui, hasta cu gama, guejjo mí pehtiju-cu. **5**Cu fariseo co cu maestro cu mí ujti cu cjahni, mí teniju göhtjo cu costumbre-cu. Cja guegueju bi dyoniju car Jesús:

—Yu hñojo yu guí ujti, ¿dyoca jin gui ten cu costumbre cu xí nzoguju cum titaju? Jin gui xüdyeju rá zö bbu ya xta ziju tjujme.—

6Nu car Jesús bi dädi, bi xijmu:

—Nuquiguesju, guí jiötjeju. Guí ñtiju ncja ngu gá man car profeta Isaías ya má yabbu cja bi jñux pu jar libro ca bi dyote. Bi jñuxi nar tzi palabra-na:

I man ca Ocja: Yu cjahni-yu,
i xöjtigui, pe jöntsjetjo gá
palabra,

Pu mbo úr muyju, yanu i dyo,
jin gui cuajquiju.

7Jin te ntjumu ga xöjtiguiju,
Cja pé i ujti quí mínga-cjahniu
da deni jmandado cu xí
mbentsje yu cjahnitjo.

I ncjanu ga man car palabra-ca_,
cja nuqueju, guí ñtiju ncjapu hneje_.

8Guí jejmu cu mandamiento cu xí man ca Ocja. Nu cu mandamiento cu xí man cu cjahnitjo, guí ndo ñötiju-cá cja guí teniju. Guí ndo juhmpiju ndumu ja grí xütiju cu xaro co cu vaso pa grí tziju. Cja guí ndo teniju pé dda costumbre cu i jñejmu-nu.—

9Cja bi segue bi man car Jesús:

—Nuquiguesju, jin guí cjajpiju
ncaso cu mandamiento cu xí

ddajquiju ca Ocja. Nu cu costumbre cu xí nzohquiju quir mínga-cjahniju, guehcá guí ndo cjapiju ncaso-cá.
10Car Moisés bi zoguiju nar mandamiento-na: “Gui hñihtzibi quer ta co quer me.” Guejtjo hneje bi man car Moisés: “Ca to da zan car ta o gue cár me, exque da dú-cá, da bböhti.” **11**Nuquigueju, guí xijmu yu cjahni, i nesta gu döju jar templo cam domiju, macá jin te da sobra pa gu fóx cum taju co cum meju. Tzádi, guí majmu, bí jojtjo pa to da xih cár ta o cár me: “Ya jin te dí jagö pa gu fóxqui. Ya xtú un ca Ocja göhtjo ca ndí pehtzi pa gua ddahqui.” **12**Tzádi, guí xijmu cu cjahn*i*, jin gui nesta da möx quí taju o gue quí meju. **13**Ncjaru, guí ujtiju cu cjahni jin da cjap*i* ncaso car mandamiento ca bi zoguiju car Moisés. Nu ca guí mandadotsjeju, guehcá guí bbejpíju yu cjahni da dyojet*e*. Cja guí otiju pé dda cosa rángu cu i jñejmi-ná.—

14Diguebbu ya, car Jesús pé bi nzoh cu cjahni rá ngu cu xquí jmuntzi, bi xijmu:

—Nuqueju, guí göhtjoju, gui dyodejeju cja gui ntiendeju nu dí ma: **15**I jogui gu tziju göhtjo ca te i ttzi, cja jin da contiguiju ymt zti muyju. Nu cu ntzomfeni cu i mben yu cjahni mbo í muyju, nucá, i contibi í tzi muyju. **16**Yu to i bbuy yí gu, da dyoðe te i ne da má nar palabra-ná.—

17Bbu xquí má ncjanu car Jesús, bi hñiñ cu cjahni rá ngu cu xquí jmuntzi, cja guegue bi ma gá ma hnanguadi, gá ñuti hnar ngu. Nu quí möxte bi denu cja bi dyödi di yojpi di xijmu, cja i ncja cu cosa cu

i contiguiju ymt zti muyju? **18**Bi daj ya car Jesús, bbu:

—Xiquigueju, cecja guí ncja cu pé dda cjahni hneje? Cja jin guí pádiju te i ne da man car palabra-ca? Göhtjo yu te i ttzi, jin gui tzö da contiguiju ymt zti muyju, **19**como jin gui cuti pu mero mbo ymt zti muyju. Gue cum ntzamfoju pu jabu rí ñuti ca dí tziju. Diguebbu ya, bbu xta ma tji car cjahn*i*, xtu tzoh pu ca te xtrú nzi.—

Car Jesús, bbu mí má nar palabra-nu, bi xih cu cjahni cu mí teniju, i jogui gu tziju göhtjo cu alimento. **20**Cja pé bi man car Jesús:

—Cu mfeni jin gui tzö cu i mben hnar cjahn*i* mbo úr zti muy, guehcu i contibi-cá. **21**I mben yu cjahn*i* rá ngu ntzomfeni, ncjá yu gu xihquiju ya: I jöhtibi quí bbejná cu dda hñøjø, o gue quí dáme cu dda bbejná. I bbubi bbejná co hñøjø cu jí xcá ntjajtihui. I pöhtite. **22**I mpe. I nejpi cár mejti cár mínga-cjahnihui. Guejtjo i uhui cár minga-cjahnihui. I öti ntjöti. I bbe úr tzö. Jin gui penti quí mfeni. I huíhtzi cár hñohui, i xohtzibi bbetjri, i hñixtsje, i cja ur dondo, como jin gui tzáca Ocja. **23**Göhtjo yu ntzomfeni-yu, i mben yu cjahni mbo úr muyju, cja guejyu i contibi-yá.—

Una mujer extranjera que creyó en Jesús

24Diguebbu ya, car Jesús bi bom pu, bi ma gá ma jár lindero car jöy pu jabu már bbuh cu yo jñini car Tiro co car Sidón. Cja bbu mí zöti pu, bi ñuti hnar ngu. Mí ne pa jin di bah cu cjahn*i*, cecja már bbuh

pu? Pe ndejma bi fadi. ²⁵Már bbuh pu ca hnar bbejña ca mí jnin cár ttixu, xquí zah hnar ndaji ca jin gui tzö. Bbu mí dyøh car bbejña, ya xquí zom pu car Jesús, ngueticaq bi ma bú cuati, bi ndandiñajmuu pu jay hua, bi dyöjpi favor. ²⁶Car bbejña-ca jí mûr israelita. Mûr mingu car jöy Fenicia. Guegue bi guati car Jesús cja bi dyöjpi tzu di fonguibi car ttzondaji ca xquí zah cár ttixu. ²⁷Nu car Jesús bi dädi ncjahmu jí mí ne di mötzi. Bi xifi, gue cu cjahni israelita xcuí hñeje di mötzi. Bi ma ncjahua:

—Gui jieh quí cjahni ca Ocja da nñña bbeto. Jin gui tzö gui jñajquibi quí tjuime cu bajtzi, gui dyembi cu dyo.—

²⁸Nu car bbejña pé bi xih car Jesús:

—Ncjuani, tada, bbeto i ttin cu bajtzi, pe guejti cu tzi dyo cu ra dyo pu jöy car mexa i tzi cu ngunti tjuime cu i jeh cu bajtzi da dögui.—

²⁹Nu car Jesús pé bi daj ya:

—Rá zö nur palabra xcú ma. Gui mpöj ya, gui me ir ngu, como ya xí mbon car ndaji ca xquí zah quer ttixu.—

³⁰Nubbu, bi ma úr ngu car bbejña, bi döti cár tzi ttixu, mär bbendu pu jár gama. Ya xquí jogui, como ya xquí wen cár ndaji ca Jin Gui Tzö.

Jesús sana a un sordomudo

³¹Bbu ya xquí ncja-ca, car Jesús bi bøm pu jar jöy Tiro, bi tjoh pu hnaguadi car jñini Sidón, pé gá góx pu jar jöy ca mí tsjifi Decápolis, gá nzöti pu jar mar Galilea. ³²Bbu má tjoh pu Decápolis, cu mingu pu bú tzih hnar gogu ca mí nccuni

nguá nä. Cu cjahni cu xcuí ziji, bi dyöjpi car Jesús di góx cár dye car cjahni-cq pa di jogui. ³³Nubbu, bi juejtsjehui car gogu car Jesús, bi wembi car ndo jmundo cu cjahni. Ma ya, bi fojti quí xö pu jay gu car hñøjø. Guejto bi zoh cár cjijni, co guehcq gá ndömbi cár cjajni car hñøjø. ³⁴Bi nøhtzi jitzi, bi gáhtzi, cja bi nzozo digue car jña ca mí nñaju. Bi hñimbi:

—iEfata!— Nar palabra-nä i ne da ma: iDa xoj yir gu!

³⁵Cja ngueticaq bi xoh quí gu car cjahni, cja bi joh cár cjajni hñeje, bi nä rá zö. ³⁶Diguebbu ya, car Jesús bi xih cu cjahni cu mär bbuh pu, mär ccahtiju, jin di ngöteju. Nu guegueju, ca más mír xih car Jesús jin di ngöteju, más mír tanguiju car jña. ³⁷Cja bi ndo hño í may cu cjahni-cq, bi majmu:

—Rá tzi zö yu milagro yu i øti nur Jesús. Rá ndo ngu yu cjahni xí jojqui. Guegue i xojquibi yí gu yu to jin gui øde, cja yu ngone, i cjajpi da nä rá zö.—

Jesús da de comer a cuatro mil personas

8 Cu pa-cu, mär ndo ngutsje cu cjahni cu mí teniju car Jesús. Ya xquí deju pu jabu mär bbu guegue, cja jin te mí pehtzi te di ziju. Nubbu, car Jesús bi nzoh quí möxte, bi xijmu:

²—Dí jujquigö yu cjahni rá ngu yu xí ndengui. Ya xí nzu jñujpa xí ndöhmi ya, cja jin te i pehtzi pa da ziju. ³Cja bbu gu cujmu, da ma í ngüentiju pu jar hñu, porque i bbuj yu ddaa, ndo yanu xcuí hñejmu.—

⁴Cja bi daj ya quí möxte, bi dyönijü:
 —ujto cü denda hua jabü dí bbüpju. Guejtjo hneje jin te i bbü ngü. ¿Jabü gu tötijü tjujmë drá ngü pa da niñña göhtjo yü cjahni-yü?—
 ⁵Nu car Jesús bi dyön quí möxte:
 —¿Tengü tjujmë guí pehtzijü?—
 Cja bi majmu:
 —Yojto.—
 ⁶Nubbü, car Jesús bi bbejpi carndo jmundo cü cjahni di mijpijü jöy. Cja guegue bi zeti cü yojto tjujme, bi dyöipi ejamädi ca Ocja, ma ya bi xejqui. Diguebbü ya, bi un quí möxte, cja nuchü, bi jñajü, bi möhmpijü cü cjahni rá ngü. ⁷Mí pehtzijü hneje tengü tzi möy, cja car Jesús pé bi dyöipi mpöjce ca Ocja digue cü tzi möy. Diguebbü ya, pé bi un quí möxte cja guegue-cü bi möhmpijü cü cjahni hneje. ⁸Cja göhtjo cü cjahni bi ziju, bi niñajü rá zö. Ma ya, quí möxte car Jesús bi jmuntzijü cü tzi pedazo cü xquí sobra, bi niñazijü yojto bbötze rá nojo. ⁹Cja mí bbü como go mil cü cjahni cü bi ziju. Diguebbü ya, car Jesús bi guh cü cjahni di ma í ngüjü, ¹⁰cja guegue ya bi niñati jar barco, bi mehui quí möxte. Ncjapü gá nzotijü jar lugar ca mí tsjifi Dalmanuta.

Los fariseos pidien una señal milagrosa

¹¹Diguebbü ya bú eh cü dda cjahni cü mí tsjifi fariseo, bi guatijü car Jesús pa di dyøhtibiju hnär prueba. Bi mudi bi mbömbihui palabra car Jesús. Bi dyöjpíjü car Jesús di ujti hnär milagro drí hñe jitzi, como jí mí emeju, cja xcuí hñeh ca Ocja car Jesús? ¹²Nu car

Jesús bi ntzöte, bi ungui ur dumay, como mí padi, jí mí ne di hñeme cü fariseo. Cja bi xijmu:

—Nuquejü, guí cjahnijü guí bbüpju yü pa ya, édyocä dé guí öjquijü gu öti milagro pa gui padijü, jabü xtá ejcö? Dí xihquijü ntjumay, jin tema milagro gu ujtiqijü pa gui padijü jabü xtá eje.—

¹³Cja bbü xquí ma nar palabra-ná, car Jesús bi wem pu, bi zoh cü fariseo, pé bi niñati jar barco, cja pé bi ddax car mar. Pé bi ma gá ma hnanguadi, bi mehui quí möxte.

La levadura de los fariseos

¹⁴Nu quí möxte car Jesús bbü mí niñutijü jar barco jin gá nguxju tjujmë pa di ziju, bi dabenitjoju. Hnaatjo ur tzi tjujmë bi jñaxju. ¹⁵Cja bbü már bbüpjtijü jar barco, car Jesús bi xih quí möxte:

—Gui mfödijü, jin gui ma gui jñajü car levadura ca rí hñeh cü fariseo, cja co cü cjahni cü i teniju car Herodes.—

¹⁶Bbü mí dyøj ya nar palabra-nü, bi hñöntsjeju qui amigo, éte mí ne di man car palabra-cá? Ngá majmu, pé ntoja mí nesta di döjmu tjujmë, como jin te xcuí guju.

¹⁷Nu car Jesús bi dyode te már majmu, cja bi dyöni:

—¿Dyocä guí inaju dí xihquijü guí nesta gui töjmu tjujmë? ¿Cja jí bbe guí ntiedejü ter beh cä dí xihquijü? ¿Cja jí bbe guí jaju ur huenda ja ncja ca dí ujtiqijü? ¿Cja ntzedijü guí memuyju? ¹⁸¿Cja jin guí ccähtijü te dí otigö? ¿Cja jin guí ojmu car palabra ca dí mangö? ¿Cja huá ya xcú dabenijü ja mí ncja cü milagro xcú ccäjtigijü xtú

øte? ¹⁹ ¿Cja jin guí mbeníjü ya, bbü ndú jejqui cü cutta tjujme, cja gú pøhmpijü cü cjahni cü cutta mil, cja diguebbü ya gú jmuntzijü cü tzi pedazo cü xquí sobra, tengü bbötze bi jñutzi?—

Cja bi daj ya quí möxte:

—Bi ñuxi doce bbötze.—

²⁰ Cja pé bi dyön car Jesús:

—Guejjo, bbü ndú jejqui cü yojto tjujme, cja gú pøhmpijü cü cjahni cü go mil, cja diguebbü ya pé gú jmuntzijü cü tzi pedazo cü xquí sobra, ćcja jin guí mbenijü hneje tengü bbötze rá nojo bi ñuxi bbü?—

Cja pé bi däh quí möxte:

—Bi ñuxi yojto bbötze.—

²¹ Pé bi man car Jesús, bbü:

—¿Cja jí bbe guí padijü, jin gui gue car tjujme xtú xihquijü jin gui jñampijü cü fariseo?— Ncjapü gá man car Jesús, jin di hnemejü ca mí ujti cü fariseo.

Jesús sana a un ciego en Betsaida

²² Ma ya, car Jesús bi zöti pü hnar jñini ca mí tsjifi Betsaida. Cja cü mingü pü bú tzí hnar godö, bi dyöipi car Jesús di xojquibi quí dö. ²³ Nubbü, car Jesús bi pentibi cár dye car godö, bi gøjqui pü jar jñini gá ma hnanguadi. Diguebbü ya, bi gohtzibi cár ejjini jáy dö car godö, cja bi dyux quí dye. Nubbü, bi dyoni:

—¿Cja ya xquí tzi janti ya?—

²⁴ Nubbü, bi jani car godö cja bi ma:

—Dí janti yü dda cjahni, i ne da jñejmi za, pe nuyá, i dyo.—

²⁵ Ma ya car Jesús pé bi dyux quí dye jáy dö car godö. Nubbü, bi joh quí dö car hnøjø cja bi ccähti

rá zö. Cja bi janti rá tzi zö göhtjo, hasta cü cosa cü már bbü yanü.

²⁶ Diguebbü ya, car Jesús bi bbejpi di má úr ngü, bi xifi jim pé di ñuti nu jar jñini, cja jin di göx cü cjahni toca xquí jojquibi quí dö.

Pedro declara que Jesús es el Cristo

²⁷ Diguebbü ya, pé bi bön car Jesús, pé má yojmi quí möxte. Bi ma gá ma jar jöy ca mí tsjifi Cesarea de Filipo. Má tjojmü pü cü tzi jñini cü mí bbuh pü. Cja bbü má pojmu jar hñü, car Jesús má ñahui quí möxte, cja bi dyön-cü:

—¿Te i man yü cjahni
diguejquigö? —¿Te um oficiogö?—

²⁸ Cja bi daj ya-cü:

—I bbuh cü ddaa cü i majmu, guehque gür Juan ca mí xix yü cjahni. òde, bi bböjtiqui, cja nuya pé xcú nantzi. I bbuh cü pe ddaa cü i majmu, guehque gür profeta Elías. Guejjo i bbuh cü pe ddaa cü i mandijü, gür profeta, guehquigüe hnáa quí jmandadero ca Ocja cü mí bbü ya má yabbü.—

²⁹ Cja car Jesús pé bi dyön quí möxte:

—¿Xiquigüejü, toca guí majmu
guejquigö?—

Cja bi däh car Pedro, bi xifi:

—Nuquigüe, gür Cristo-gue.

Ndí tópique, dí cjahnitjoje, du bbenquigüe hua jar jöy.—

³⁰ Nu car Jesús, bbü mí dyøj nñr palabra-nü, bi xih quí möxte, jin di ngöxtejü, ćcja guegue mí gue car Cristo?

Jesús anuncia su muerte

³¹ Ma ya, car Jesús bi mudi bi ujti quí möxte, mí nesta guegue

di sufri rá ngu cja di bböhti, como guehcá di ncajpi car cjahni ca di bböjni hua jar jöy. Nu cu tita cu mí pehtzi quí cargo, co cu möcja cu mí mandadobi cu pé ddaa, cja co hnëh cu maestro cu mí nxöh car ley, göhtjo guegueju di göniju car Jesús, cja di mandadoju pa di bböhti. Cu cjahni-cá di majmu, jí mí gue car Cristo ca xtrú hnix ca Ocja. Nu car Jesús bi xih quí möxte, bbu ya xtrú ndu guegue, pé di jñä úr jná ca xtrá jñijpa.³² Car Jesús, rá zö gá xih quí möxte nür palabra-nü, pa di ntiedeju. Cja bbu mí dyöh car Pedro, mír män car Jesús mí nesta di bböhti, guegue bi zitzi, gá metsjehui hnanguadi, cja bi xifi: “¿Dyoca guí mä i nesta gui tu?” Ncjahmu bi huenti car Pedro, ca gá mä ncjapu.³³ Nu car Jesús pe bi bböti, bi jianti cu pe dda quí möxte cu mí teni, cja bi huenti car Pedro, bbu, bi xifi ncjahua:

—Nuque, Pedro, dyo guí xijqui ncjanu. Guí yojmi car Satanás. Jin gu øjti nür palabra xcuá xijqui, como jí xcuá hnëh ca Ocja quer mfeni. úr mfenitjo hnar cjahni.—

³⁴ Ma ya car Jesús bi nzoh quí möxte co cu pe dda cjahni cu mí teni, cja bi xijmu:

—Nuquigueju, bbu to i ne da dengui, da ncjá ncja nguguigö, ya jin da hmütsje, cja jin da möjtsje cár vida. Da dengui, masque da sufri ncjaguigö gár sufrigö bbu xta bböjtigui.³⁵ Car cjahni ca jin guí ne da denguigö, como i ne da möjtsje cár vida, da bbedi. Nu car cjahni ca i ne da denguigö cja da hnëmë nür tzi ddadyo jñä nü dá jagö, masque xín da bbeh cár vida

por rá nguejquigö, guegue da döti car nzajqui ca ntjumuy rá zö.³⁶ ¿Ter beh ca da sirvebi hnar cjahni bbu da cjajpi úr mejti göhtjo yu te i bbüjcua jar mundo, pe bbu xta zöh car pa bbu xta du, ndejmä da bbeh cár tzi møy?³⁷ Jin gui bbuh car manera ja grá cjutiju domi pa jin da bbej yum tzi møyju.³⁸ Yü pa ya, i bbuj yu to jin gui ne da denguigö, porque i pehtzibi úr tzö yu pe dda cjahni, cja nuyu, jin gui eme ca Ocja, cja i öti ca rá nttozo. Ca to jin gui ne da dengui cja jin gui ne da dyöj yum palabra, porque i pehtzi úr tzö, bbu pé xcuá ecö, xtá mangö jin te um ncjagöbbe car cjahni-ca. Bbu xcuá coji, xcuá yobbe quí anxe cu i pejpi cam Tzi Ta, cja da nigui te tza ngu cár ttzedi. Nugö, dûr cjahni, xpá menqui hua jar jöy.— Ncjapu gá män car Jesús.

9 Car Jesús guejjo bi xih quí möxte:

—Ciento, dí xihquiju, i bbüjcua yu dda cjahni yu jin da du hasta gue bbu xtrú ccahtiju bbu xta mandado ca Ocja hua jar jöy, göhtjo co ni cár ttzedi.—

La transfiguración de Jesús

²Cja diguebbu ya, pé ddajto mpa, car Jesús bi zix car Pedro co car Jacobo co car Juan, jøña-cu. Bi zitzi gá möjmu hnar ttø, már ndo nte. Cja car Jesús bi hna mböjtí ca mí nigui, hnähño gá nigui.³ Mí juev quí dajtu már tzi nttaxi, ncja ngu yu xicja. Jin gui bbuh hnar cjahni hua jar jöy di padi di cjajpi cu dajtu drá ndo nttaxi pa di nigui ncjapu.⁴ Guejjo bi nigui pü jar ttø car Elías co car Moisés, xcuí hnëj

nü jitzi, cja már nüahui car Jesús.

⁵Cja bbü mí ccahti car Pedro cü jñü hñöjø már nüajü, bi xih car Jesús:

—Nuque, maestro, rá zö dar hmüpju hua. Gu ótije jñü cü ddöxingü gá dyeza, ca hnaa pa guehue, pé hnaa nur Moisés, cja ca pü hnaa ya nur Elías.—

⁶Bi hnaa mä ncjapü car Pedro, porque jí mí padi te di mä. Mí ndo ntzü cü jñü möxte por rá ngue ca mí ccahtijü, cja mí ndo dyo quí mfenijü. ⁷Diguebbü ya, bü eh hnar guy, bi gujti gueguejü göhtjo, bi gohmijü cár xümü. Cja quí möxte car Jesús bi dyödejü hnar jñü mbü nü pa mbo car guy, mí ma:

—Gue num Tügö-nü, dí mädi. Gui dyödejü ca i mä.—

⁸Diguebbü ya bi jani quí möxte, cja bi jiantijü, ya xi már ddatsje car Jesús.

⁹Cja bbü mbü cajmu pü jar ttöø, car Jesús bi ccax quí möxte, bi xijmu jin di ngóxte te xcuí ccahtijü pü jar ttöø hasta gue bbü ya xtrü ndü guegue cja pé xtrü jñü ár jñü. Bi xijmu, guegue mí gue car cjahni ca xcuí bbejni hua jar jöy. ¹⁰Nu quí möxte bi ndo mbüen car palabra ca xquí tsijimu, cja bi hñöntsjejü, éte mí ne di man car palabra, bbü ya xtrü ndü guegue cja pé xtrü jñü ár jñü? Pe jin gá ngóxtejü. ¹¹Ma ya, gueguejü bi dyönijü car Jesús nur nttöni-nü:

—¿Te rá nguehcü i man cü maestro cü i ujtiguije car ley, i inajü, i nesta bbüeto du eh car profeta Elías, cja diguebbü ya pé xtu eh car cjahni ca da hñix ca Ocja pa da mandadoguije?—

¹²Bi daj ya car Jesús, bi xih quí möxte:

—Ciento car palabra-cü. Büeto ba eh car Elías pa da nzoj yü cjahni, santá da jojqui quí tzi müyü pa drí ntjejü ca hnaa. Xiquiguejü, écja guí pädijü te i man cü Escritura digue car hñöjø ca di hñix ca Ocja cja du pejni hua jar jöy? I man cü Escritura, guegue da nestu da sufri rá ngü, jin da ttühtzibü, cja jin da ttüeme. ¹³Nugö, dí xihquijü, ya xpá hñeh ca hnar jmandadero ca Ocja ca xí ngo ár lugar car Elías. Nu yü cjahni xí möhtijü. Xí cjapijü como ngu ga mam pü jar Escritura di ncajapi.—

Jesús sana a un muchacho que tiene un espíritu malo

¹⁴Diguebbü ya, car Jesús co ni cü jñü quí möxte cü xquí zitzi, bi zotijü pü jabü már bbü cü pe ddaa, bi ccahtijü hnar ndo jmundo cü cjahni. Nucü, xquí hñüti madé quí möxte car Jesús. Guejijo már bbü pü cü dda maestro cü mí ujti cü cjahni car ley. Gueguejü már huenihui quí möxte car Jesús. ¹⁵Nguetica cü cjahni rá ngu, bbü mí jiantijü car Jesús, ya xi mbü eje, bi ndo mpöjmu, bi gujü ár ddiji, bi ma bü ntjejü cja bi zenguajü. ¹⁶Nubbü, car Jesús bi dyön quí möxte:

—¿Ter beh cü már önquierjü yü maestro?—

¹⁷Cja bi dah ca hnaa digue cü cjahni cü xquí jmuntzi pü:

—Nuque, Maestro, xtú tzí num ttü hua jabü guí bbü, i yojmi hnar ndüji ca jin gui tzö, jin gui jegui da nü. ¹⁸Pü jabü i dyo num ttü, i hnaa enti car ttzondaji i cjapü da füj nur ne cja da ndo guxti quí ttzafi. Cja ya xtú öjpi yir möxte di

fongui tzu car ttzondaji-ca, pe jí xcá hñemebiju.—

¹⁹Diguebbu ya bi dah car Jesús, bi xih cu cjahni:

—Nuquigueju, ¿dyoca jin guí emeju, rá nzeh ca Ocja pa da möxquiju? Ya xná ngu tiempo xtú hmupju. ¿Cja jim be guí emeju? Ya jin gu tzejti ca guí cjakuiju. Bú tziju hua car bajtzi ya.—

²⁰Nubbu, bú ttzimpi car bajtzi hñojo. Cja cár ndaji ca Jin Gui Tzö, bbu mí ccahti car Jesús, bi cjakpi car bajtzi bi ndo jua, cja nuca bi funtzi, bi ndo mbuntzi jar jöy, mí ndo fuh cár ne. ²¹Car Jesús bi dyön cár ta car bajtzi:

—¿Tengu tiempo i ncjanu nir bajtzi?—

Cja bi daj ya cár ta:

—Desde bbu mí chi tchu. ²²Rá ngu vez xí dyenti jar tzibi, o bbu jina, guehpu jar deje. Ngu i ne da möhti. Pe bbu guí pádi te guí cjakpi nám ttu, guí juiguije, cja guí föxquiye tzu.—

²³Cja bi daj ya car Jesús:

—Jaa, dí pádi gu jojqui, pe guehquee, i nestá guí hñeme göhtjo mbo ir may. Ca to i emee ca Ocja, ca te da dyödi, da ttóhtibi.—

²⁴Diguebbu ya, cár ta car bajtzi bi náa nzajqui, bi dadi:

—Nugö, dí tzi emee. Gui föxqui tzu pa gu emee göhtjo mbo um may.—

²⁵Nu car Jesús, bbu mí ccahti, ya xi mbá ndo cuati cu cjahni már ngu, bi huenti cár ndaji ca Jin Gui Tzö, bi xifi ncjhaua:

—Nuquigue, gúr ttzondaji, gúr ngone cja gúr gogu. Nuya, dí xihqui guí póm pu jabu grá bbu, cja ya

jim pé gui yojpi gui cuti mbo úr may nur bajtzi.—

²⁶Nubbu, car ttzondaji bi ndo mafi, cja bi juati nzajqui car bajtzi hñojo. Diguebbu ya, bi bóni, cja ya jí mí hñan car bajtzi, bi goji ncjahmu ya xquí du. Már ngu cu cjahni cu már ccahtiju, bi majmu: “Ya xí ndu-nu.” ²⁷Nu car Jesús bi zetibi cár dye car bajtzi hñojo, bi xotzi cja guegue-ca bi bböy.

²⁸Diguebbu ya car Jesús bi mehui quí möxte, bi ñutiju hnar ngu. Cja como már bbutsjeju pu, quí möxte car Jesús bi dyöniju guegue:

—Xigöje, ¿dyoca jí xcá hñemeguije car ttzondaji ca xtá bbejpije di bóni?—

²⁹Cja car Jesús bi dadi:

—Car ndaji-ca co cu pe dda ttzondaji cu i jñejmi, jin guí ne da bóniju. Ca to i ne da fongui-cu, i nestá da ayuna cja da dyöjpí ca Ocja pa da mötzi.—

Jesús anuncia otra vez su muerte

³⁰Diguebbu ya, bi bóm pu jar lugar-ca car Jesús, mí yojmi quí möxte, má tjojmu jar estado Galilea. Nu car Jesús mí ne pa jin to di badi jabu mír ma. ³¹Como mí ne di xih quí möxte ter beh ca di ncajpi guegue, mí ne jontsje-cu di hmubi. Mí xijmu, ya xti ttzu guegue, di ndöjti jay dye quí contra, cja di bböhti. Pe bbu ya xtrú ndu, pé di jña úr jña ca xtrá jñujpa. Guejtjo bi xijmu, guegue mí gue car cahni xcuí bbejni hua jar jöy. ³²Nu quí möxte car Jesús jin gá ntiedeju te mí ne di ma. Guejtjo jin gá dyöjpíju di xijmu rá zö ter beh ca mí ne di

xijmu, como mí pehtzi ár tzójü di dyönijü-ca.

¿Quién es el más importante?

³³Ma ya bi zöñiju jar jñini Capernaum, cja bbü ya xquí ñütijü cár ngü, car Jesús bi dyón quí möxte:
—¿Ter beh cä ngrí hueniju bbü ndá dyoju jar hñü?—

³⁴Nu gueguejü ya, jin te gá ndädijü, como bbü mbá ejmu jar hñü, mbá hueniju toca más di jña cár cargo cja di mandadobi cü pe ddaa. ³⁵Nubbü, car Jesús bi mijöy, cja bi nzoh quí möxte, bi xijmu:

—Ca to i ne da mandado, guegue da cjajpi quí jmandado cü pe ddaa, da ncjá ncja hnar muzo.—

³⁶Ma ya car Jesús bú tzí hnar tzi bajtzi ca már bbuh pü cerca, bi hñiti madé quí möxte cja bi xijmu:

³⁷—Car cjahni ca i emegui cja da möxi hnar tzi bajtzi ncja ngü-na por rá nguejquigö, jin gui jøñä car tzi bajtzi i fötzi. Ncjahmu guejquigö di föxquigö hneje. Cja bbü to i föxquigö cja i negui, guejto i ne car Tzi Ta jitzi ca xpá menquigö.—

El que no está contra nosotros está a nuestro favor

³⁸Diguebbü ya, bi man ca hnar möxte ca mí ju cár tjuju mür Juan, bi xih car Jesús:

—Nuque, maestro, xtú ntjeje hnar hñøjø, mí fongui ttzondaji cja mí nömbiqui quer tzi tjuju. Nu car cjahni-ca, jin gui tenguijü, eso dú ccahtzije, dú xijme di jieh ca mır dyoti-cá.—

³⁹Cja bi man ya car Jesús:

—Jí mır ntzöhui güi ccahtzijü, porque ca to i nömbigui cam

tjuju cja por rá nguejquigö i öti milagro, jin güm contragö-ca. ⁴⁰Car cjahni ca jin gui contragui, i ne da möxquigö. ⁴¹Cja bbü to te da ddahquijü por rá nguehcä guir tenguijü, mádi hna vaso ur tzetje, car Tzi Ta jitzi da bendeci car cjahni-ca.

El peligro de caer en pecado

⁴²Gui jñaju ur huenda, jin to gui ma gui jiötijü pa da dyoti ca rá nttzo. Bbü to da jiöti hnar cjahni ca cja i füdi da dengui pa da dyoti ca rá nttzo, guegue da ttun hnar castigo drá ndo jitzi. Más di joh bbü di hnati hnar cjüuni jár dyüga cja di ttenti nü jar deje nü jabü rá ndo je, cja jin di jiöti cár hñohui ca cja i füdi da hñemegui pa da dyoti ca rá nttzo. ⁴³Guejiquigüeü, gui jñaju ur huenda hneje pa jin gui dyötijü ca rá nttzo. Bbü da jiöhqui ca hner dye pa gui dyoti ca rá nttzo, gui jieh ca guir dyöte. Más di joh bbü güi dyoqui quer dye cja jin güi dyoti ca rá nttzo, como más da joh bbü gui cüti pü jabü i bbuh ca Ocja, gur ntchodye, ni ndra ngue bbü da ttentiqui pü jabü jin gui tzö, göhtjo co yojo yir dye, cja grí sufri pü jar tzibi ca jin gui juiti. ⁴⁴Cü cjahni cü da ttenti pü jabü jin gui tzö, jin da tzöya ca drí sufriju göhtjo ur tiempo, como i zö pü car tzibi ca jin gui juiti. ⁴⁵Ncjadipü, bbü da jiöhqui ca hner hua pa gui dyoti ca rá nttzo, jin gui ma gui dyöte. Más di joh bbü güi dyoqui quer hua cja jin güi dyoti ca rá nttzo, como más da joh bbü gui cüti pü jabü i bbuh ca Ocja gur ntchohua, ni ndra ngue bbü da ttentiqui pü jabü jin gui tzö, göhtjo

co yojo yir hua, cja grí sufri pü jar tzibi ca jin gui juiti. ⁴⁶Cu cjahni cu da ttenti pü jabü jin gui tzö, jin da tzöya ca drí sufrijü göhtjo ur tiempo, como i zö pü car tzibi ca jin gui juiti. ⁴⁷Guejto bbü da jiöhqui hner dö pa gui dyoti ca rá nttzo, gui jiej ya ca grí dyote. Más di joh bbü güi jñahmi quer dö güi dyey cja ya jin güi dyoti ca rá nttzo, como más da joh bbü gui cuti pü jabü i bbüh ca Ocja co hnaatjo quer dö, cja jin da ttentiqui pü jabü jin gui tzö, göhtjo co yojo yir dö. ⁴⁸Cu cjahni cu da ttenti pü, jin da tzöya ca drí sufrijü göhtjo ur tiempo, como i zö pü car tzibi ca jin gui juiti.

⁴⁹I nesta gu xöipi nám cuerpojü da sufri pa jin da daguijü ca rá nttzo. Cada hnaagöjü gu sufrijü ante que gu tzönjü pü jabü bí bbüh ca Ocja. ⁵⁰Rá ndo zö nür u, i ndo sirve. Pe bbü jin gui uxi car u, éte gui cajapi pa pé da uxqui? ujtjo. Nuquiguejü, i nesta gui ncrajü ncja car u ca rá uxi pa ncrapü grí hmüpü rá zö, cja da fadi um cjahniqüiguejü.—

Jesús enseña sobre el divorcio

10 Diguebbü ya, car Jesús bi bóm pü jar jñini Capernaum, bi ma gá ma jar estado Judea. Guejto bi ma jar jöy ca mír hmüpü nu rí ncjanü car datje Jordán. Cja pé bi jmuntzi cjahní rá ngü, bi denijü car Jesús, cja guegue bi ujti cár palabra ca Ocja, ncja ngü nguá dyote cada bbü mí jmuntzi cu cjahní. ²Nubbá, bi zoh cu dda fariseo, bi guati pü jabü már bbüh car Jesús. Mí ne di dyóhtibijü hnar prueba, eso bi dyönijü:

—¿Cja i ttuni ur tsjejqui hnar hñøjø da weguehui cár bbejña, da guy?—

³Nu car Jesús bi dädi:

—¿Te i mäm pü jar ley ca bi dyoti car Moisés?—

⁴Cja bi majmu:

—Car Moisés i ungui ur tsjejqui hnar hñøjø di xoxi hnar jehmi pa da weguehui cár bbejña.—

⁵Nubbá, pé bi män car Jesús:

—Guegue car Moisés bi dyójtiquijü nür mandamiento ná jöntsje porque bi ccähti, rá ndo me quir tzi møyju. Eso, bi ddahquijü ur tsjejqui gui weguehui quer bbejña. ⁶Pero desde bbü mí mäj nür mundo, ca Ocja bi dyoti hnar hñøjø cja bi uni hnár bbejña pa di hmubi. ⁷Bi mä guegue: “Hnar hñøjø da zoh cár ta, co cár me, cja da zix cár bbejña, da hmubi. ⁸Nu cu mí yojo, da cja hnatio ya.” Por eso, ya jin da weguehui, nuya da hmubi.

⁹Cu yojo cu xí pejni ca Ocja pa da cja hnatio, jin gui ne guegue pa to da juejque.— Ncjanü gá ndäh car Jesús.

¹⁰Diguebbü ya, bbü ya xquí nüti car Jesús pü mbo car ngü, quí möxte pé bi dyöni cja rá zö bbü to da weguehui cár bbejña? ¹¹Cja car Jesús bi xijmu:

—Hnar hñøjø ca ya xí ntjajti, bbü da weguehui cár bbejña cja pé da ntjajtihui pe hnaa, i öhtibi ca rá nttzo ca bbeto úr bbejña. I poni ncjahmu xí yohti bbejña. ¹²Guejto hnar bbejña ca ya xí ntjajti, bbü da weguehui cár dame cja pé da ntjajtihui pe hnaa, i öhtibi ca rá nttzo ca bbeto úr dame, ncjahmu xí yohti dame.—

Jesús bendice a los niños

¹³Diguebbü ya, bú eh cu dda cjahní, mbá tzí quí tzi bajtzi pü

jabu már bbuh car Jesús pa di dyux quí dye, di bendeci. Nu quí möxte car Jesús bi huentiju cu cjahni cu mbá tzí quí bajtzi, mí ne di ccahtziju. ¹⁴Nu car Jesús, bbu mí dyøde te mí ncja, bi ungui ur cué, cja bi xih quí amigo:

—Guí jiejmu yu tzi bajtzi du ecua jabu dí bbuy, dyo guí ccahtziju. Cam Tzi Ta jitzi xí ungui ur tsjejqui cu cjahni cu i ncraju ncja ngu yu tzi bajtzi da hmuh pu jabu i mandado guegue. ¹⁵Cierto, dí xihquiju, ca to jin da guati jár dye ca Ocja pa da jñegui da mandadobi, ncja ngu hnar tzi bajtzi ga jñegui da hmejpi jmandado, jin da ñuti guegue pu jabu i mandado ca Ocja.—

¹⁶Diguebbu ya, car Jesús bi dex cu tzi bajtzi, bi dyux quí dye, cja bi mahtibi ca Ocja.

Un joven rico habla con Jesús

¹⁷Diguebbu ya, car Jesús bi bøm pu, má pa jar hñu. Cja bú eh hnar bajtzi hñøjø, bú cju ur ddiji, bi guati guegue. Bi ndandiñajmu pu jay hua car Jesús, cja bi dyöni:

—Nuquigue, Maestro, rá ndo zöquigue, éter beh ca gu øte pa gu töti car nzajqui ca jin da tjegue?—

¹⁸Nu car Jesús bi dajti:
—¿Te rá nguehcu guí xijqui rá ndo zöguigö? Jin te i bbu cjahni drá ndo zö, ddatsje ca Ocja. ¹⁹Ya xquí padi te i man cu mandamiento cu xí ddajquiju ca Ocja. I man ncjhaua: “Jin guí pohtite. Jin guí jiöhtibi cár bbejña pe hnar hñøjø, ni digue cár dame pe hnar bbejña. Jin guí mpe. Jin guí ñajquibi bbetjri quer minga-cjahnihui. Jin guí jöjte. Gui hñihtzibi quer ta hneh quer me.”—

²⁰Nubbu, bi dajti car hñøjø, bi ma: —Nuque, Maestro, göhtjo yu mandamiento-yu xtú øte desde bbu ndúr bajtzitjo.—

²¹Car Jesús ya bi judö, cja bi mädi. Diguebbu ya bi xifi:

—I bbejti hnar cosa pa gui dyøte. Gui ma ya, bú po göhtjo cu guí pehtzi, cja gui jejquibi car domi cu tzi probe. Nubbu, cja da jogui pé gu eje gui tenguigö. Bbu gui dyøte ncjapu, xquí pehtzi ca ntjumu rá zö pu jar jitzi.— Ncjanu gá xifi.

²²Nu car bajtzi hñøjø, mí dyøj nar palabra-naq, bi jmidu. Bi wembi car Jesús, bi ma, mí dumhytjo, como mär ndo ngutsje cu mí pehtzi.

²³Diguebbu ya, car Jesús bi jianti göhtjo cu mär bbuh pu, cja bi xih quí möxte:

—Drá ndo ntji pa gue yu rico da guati pu jár dye ca Ocja cja drí jñegui pa da mandadobi.—

²⁴Bbu mí dyøj ya nar palabra-na quí möxte car Jesús, bi ndo hño í muyju. Nu car Jesús pé bi yojpi bi xijmu:

—Nuquigueju, um tzi bajtziqiju, jin tza i ngu yu cjahni yu i mben cár domiju co yu pé dda yu i pehtziju da ñuti pu jabu i mandado ca Ocja. Da zöjpiju drá ndo ntji, como rí ma úr muyju yu te i pehtziju. ²⁵¿Cja da jogui da tjoh hnar camello pu jár gu hnar dyofani? Dí xihquiju, más drá ndo ntji pa hnar rico drí ñuti pu jabu i mandado ca Ocja.—

²⁶Diguebbu ya, más bi ndo hño í muy quí möxte car Jesús, cja mí mantsjeju:

—Nubbu, éja da ncja yu cjahni pa drí dötiju car nzajqui ca jin da tjegue? ¿Cja huá jin to da döti-ca?—

27 Nu car Jesús pé bi ccahti-cʉ cja bi xijmʉ:

—Yu cjahni, jin gui tzö da dötitsje car nzajqui ca jin da tsegue. Nu ca Ocja i padi ja ncja drí dyøte göhtjo ca i ne. Guegue i padi ja ncja da un yʉ cjahni car nzajqui ca jin da tsegue.—

28 Diguebbʉ ya car Pedro bi xih car Jesús, bi hñimbi:

—Dyøjmaja, um tzi Jmuquije, xtú tzoguije göhtjo ca ndí pehtzije cja xtú tenquije, éter beh cʉ da ttajquije?—

29 Cja bi dah car Jesús, bi xijmʉ:

—Ciento nā dí xihquijʉ, como ngu xquí tzoguijʉ cʉ ngui pehtzijʉ por rá nguejquigö. Göhtjo yʉ cjahni yʉ xtrú nzoh cár ngu o quí cjuada o quí ncjʉ o cár ta o cár me o cár bbejña o quí bajtzi o quí jöy, cʉ to xtrú nzoy-yʉ pa da denguigö cja da tungui nur tzi ddadyo jñā nʉ dá ja, ca Ocja da cohtzibi más drá ndo ngu ni digue göhtjo cʉ xí nzogui, da uni hua jar jöy rá ngu quí hñohui cʉ da mādi cja co rá ngu cʉ cosa cʉ i nesta, más drá ngu ni ndra ngue cʉ xí nzogui, masque guejto da ttóhtibi tujni por rá nguejquigö. **30** Da cohtzibi rá ngu vez cár ngu, quí hñohui, cár ta, cár me, quí bajtzi, quí jöy, cja nu pʉ jitzi, pé da ttuni car nzajqui ca jin da tsegue. **31** Pe i bbʉ rá ngu yʉ cjahni yʉ i ttíhtzibi yʉ pa ya, cja nuyʉ, jin da ttíhtzibi bbʉ xta mādi xta mandado ca Ocja hua jar jöy. Guejto i bbʉ rá ngu yʉ to jin gui ncrajpi ncaso yʉ pa ya, cja nuyʉ, da ttíhtzibi bbʉ xta nigu cár jmmandado ca Ocja.—

Nuevamente Jesús anuncia su muerte

32 Diguebbʉ ya car Jesús co quí möxte má dyoju jar hñu, mír

möjmʉ Jerusalén. Car Jesús má bbeto, nu quí möxte má bbefajʉ. Mí mbeníjʉ ca xquí man car Jesús, mí dyo quí mfenijʉ cja mí ntzujʉ. Ma ya, car Jesús pé bi zixi hnanguadi quí möxte pʉ jabʉ jin te már bbʉ cjahni. Cja pé bi xijmʉ te di ncrajpi guegue.

33 Bi ma:

—Como ngu gri ccahtiju, ya dár pøxjʉ Jerusalén. Nu pʉ, da ndöguigö jáy dye cʉ möcja cʉ i mandadobi cʉ pé ddaa, co cʉ maestro cʉ i ujti yʉ cjahni car ley. Nucú da ma, rí ntzöhui gu tu, cja da döguigö jáy dye cʉ cjahni cʉ jin gui judio pa da bbötigui. **34** Cʉ cjahni-cá, da imbiguitjo, da jiubigui, cja da zoxqui. Drí gax ya, da möjtigui. Pe bbʉ xtrí cja jñujpa, pé xtá jñā um jñagö. Nugö dür cjahni xpá bbenqui hua jar jöy.—

Jacobo y Juan piden un favor

35 Diguebbʉ ya, car Jacobo hñeh car Juan, quí ttu car Zebedeo, bi guatihui car Jesús, bi xijmi:

—Nuquigue, Maestro, dí nebbe gui cjaguibbe car favor gu öhquibbe.—

36 Cja car Jesús ya bi dādi:

—¿Tema favor guí ne gu øjtiquihui?—

37 Cja gueguehui bi majmi:

—Gui cjaguibbe nʉ hnaa da mi jer derecho, cja nʉ pe hnaa da mi jer ntchohta, bbʉ xta ttahqui quer cargo pa gui mandado hua jar jöy.—

38 Diguebbʉ ya, car Jesús bi dādi:

—Jin guí pādihui ja i ncja nʉ xcú dyøjquihui. ¿Cja gui tzejti gui sufrihui ca gu sufrigö? ¿Cja gui jiötihui car prueba ca da ttøjtiguigö?—

39 Cja bi daduhui car Jacobo co car Juan:

—Dyo ya ca, xta jotibbe.—

Diguebbu ya, car Jesús pé bi xijmi:

—Ciento da ncjahquihui gui sufrihui ncja ngu gra sufrigo. Guejtjo da ttojtiquihui hnar prueba ncja ngu ca da ttojtiguigo. **40** Pe nu ca xcu dyojquihui, na hnaa da mi jam jogui dye, cja na pe hnaa jam ntchohta dye, jin di pehtzigo derecho pa gu ddahquihui-ca. Nuca, da ttun cu cjahni cu ya xi mben ca Ocja da uni.—

41 Diguebbu ya, cu pé dda deteta qui möxte car Jesús, bbu mi dyodeju ter beh ca xqui dyodihui car Jacobo co car Juan, bi uniju ´er cue. **42** Nu car Jesús bi nzoho göhtjo qui möxte, bi xijmu:

—Nuquigueju, guí padiju ja i ncja cu cjahni cu i mandadobi cu nacion hua jar joy. Guegue-cu i hnixtsje cja i ndo bbejpi jmandado cu pe dda cjahni, pa da fadi i ja ´er cargoju cja i nesta da ttojte. **43** Nuquigueju, da hnahno ca gui dyotiju. Bbu to i ne da ttihtzibi, guegue da pejpi yu pe ddaa. **44** Ca to i ne da nccahti rá zo, guegue da cja ur muzo, da cjajpi ur jmandado yu pe ddaa. **45** Como nugo, di ncjago pu, dur cjahni xpa bbenqui hua jar joy ncja hnar muzo. Ji xta eje pa da pejpigui yu pe dda cjahni. Nugo xta eje pa gu foxco-yu, cja pa gu do cam vida pa dri mehtzi car nzajqui rá ngu cjahni, jin da bbediju.—

Jesus sana a Bartimeo el ciego

46 Diguebbu ya, car Jesús co qui möxte bi zotiju jar jini Jerico, cja

bi tjojtiju pu. Bbu ya xi má poniju jar jini, car Jesús co qui möxte co pe dda cjahni mar ngu, bi tjojmu pu jabu mar ju hnar godo. Car godo mí ju car tjuju mur Bartimeo, mur ttu ca hnar hnijo ca mí tsjifi ur Timeo. Guegue car godo mí juh pu jar nttani car hnu, mí öh car limosna. **47** Bi dyode, ya xi mba eh pu car Jesús ca mur mingu Nazaret, cja bi nzoh car Jesús, bi mahti pa di mötzi. Bi hnina:

—Nuquigue, Jesús, xqui hneje digue car cji ca ndo ur David pa gui mandadoguije, gui foxqui tzu.—

48 Cu cjahni rá ngu cu má tjoj pu, bi huehti car godo, bi xijmu di gohti ur ne. Nu guegue más mir ndo mafi nzajqui, mí ina:

—Nuque, Jesús, xcu hneje pa gui mandadoguije, gui juiguigui tzu.—

49 Diguebbu ya, bi hmoh car Jesús, bi mandado di ttzoh car godo cja du ttzimpi guegue. Nubbu, bu ttzoh car godo cja bi tsjifi:

—Gui mpoj ya cja gui bboy, i nzohqui car Jesús.—

50 Guegue ya bi mon car dajtu ca mí poti, bi bbo nttzedi, sta bi ntsjoqui cor pojo cja bi guati car Jesús. **51** Nu car Jesús ya bi xifi:

—¿Ter beh ca guí ne gu cjahqui ya?—

Cja bi daj ya car godo:

—Nuquigue, Maestro, di ne gui xojqui tzu yem do.—

52 Cja bi man car Jesús, bbu:

—Ya xi xoj yir do, como xcu hnemegui. Nuya, ya xi jogui pa gui me ir ngu.—

Bbu mi man cu palabra-cu, bi xoh qui do ca mur godo jmaja, cja bi den car Jesús pu jabu má pa.

Jesús entra en Jerusalén

11 Car Jesús coquí möxte mír möjm̄u Jerusalén. Bb̄u ya xti tjojm̄u cu tzi jñini Betfagé co Betania, bb̄u ya xi mír jñantihui car ttøø ca i tsjifi Olivos, car Jesús bi guyo quí möxte, bi xijmi:

2—Gui mēhui ya nür tzi jñini nü rá cjanu. Cja bb̄u ya xcrí cutihui, xquí tötihui hnar tzi burro, rá hnati p̄u, jin to bbe i tøgue. Gui xohtihui cja gu ehu hua. 3Cja bb̄u to da xihquihui: ¿Dyocá guí xohtihui nür tzi burro? gui xijmi: Cam Tzi Jmuje i joni, cja ngueticā xcuá e xtá tzogui. Gui xijmi ncjapu.—

4Diguebbu ya bi ma cu yo quí möxte, bú tötihui car tzi burro, már hnati p̄u tji, p̄u jár goxtji ca hnar ngu, p̄u jabu mí mbonti yoso tzi hñu. Bú xohtihui bb̄u. 5Cu ddaa cjahni cu már bböjti p̄u bi xijm̄u:

—¿Te guí pejmi? ¿Dyocá guí xohtihui nür tzi burro?—

6Gueguehui ya, bi xijmi ncja ngu gá man car Jesús. Cja diguebbu ya, bi tjegui bi dyenihui car burro, bb̄u.

7Bi dyenihui gá nzøm p̄u jabu már bb̄uh car Jesús. Bi gax p̄u jár xutja car tzi burro cu dda quí dajtū cu mí pötiju, cja bi jñux p̄u car Jesús. Már bb̄uh p̄u cu dda cjahni cu má yojm̄u car Jesús, mír möjm̄u Jerusalén.

8Cu ddáa bi zejqui quí xi cu za, bi hmetoju, bi xijm̄u p̄u jar hñu p̄u jabu xti tjoh car Jesús, cja bi nejadiju p̄u co ni quí dajtuju, bi xijm̄u p̄u jar hñu.

9Cu cjahni cu má bbeto co hn̄e cu má bbefa, mí mafi nzajqui, mí majm̄u:

—Da ncja úr nzajqui nü to ba eje. Cam Tzi Jmuju ca bí bb̄u jitzi da

bendeci nür hñøjø nü ba eje, como xpá mejni guegue. 10Car Tzi Ta jitzi da möx nür hñøjø nü ba eje pa da mandadoguiju, como guejná da go jár lugar ca ndom titaju David. Dí xöjtibiju ca Ocja ca bí bb̄u nü jitzi, dí ndo öjpju mpöjcje.—

11Diguebbu ya car Jesús bi zøm p̄u jar ciudad Jerusalén, cja bi guati p̄u jar ndo templo. Bi ccahti göhtjo te már ncja p̄u, cja pé bi bøm p̄u Jerusalén gá ma jar tzi jñini Betania, como ya xquí nde. Guehp̄u már ox p̄u. Guegue mí yojmi cu doce hñøjø cu xquí hñitzi gá möxte.

Jesús maldice a la higuera sin fruto

12Car jiax-cá, car Jesús pé bi bøm p̄u jar tzi jñini Betania pa pé drí ma Jerusalén. Cja bb̄u má dyo jar hñu, bi duntju bb̄u. 13Bi jianti hnar za gá higo, ya xi mí tu quí xi, cja bi guati pa di ccahti ¿cja mí tu higo car za? Pe jin te gá ndöti. Jøntsje quí xi mí tu, como mí bbejtjo di zøh car tiempo pa di du cu higo. 14Diguebbu ya, car Jesús bi xih car za:

—Desde rá pa ya, pa göhtjo ur tiempo, jin tema ixi gui tu.—

Cja quí möxte car Jesús bi dyojm̄u nür palabra nü bi ma guegue.

Jesús purifica el templo

15Cja bb̄u mí zöti p̄u Jerusalén car Jesús, pé bi guati p̄u jár tji car ndo templo, cja bi mudi bi fongui cu cjahni cu mí mpö p̄u, co hn̄eh cu mí ntöm p̄u. Bi dyentibi quí mexa cu cjahni cu mí pöti domi, co quí tjujni cu to mí pö paloma. 16Guejtjo bi ccax cu cjahni cu mí tu quí bbötzi, mí tjoh p̄u jár tji car templo

ncjahmu dur hñutjo. ¹⁷Guegue bi nzoh cu cjahni, bi xifi:

—I jux pu jar Escritura nar palabra nü i xijquijü ja da ncja drí jnu nár ngü ca Ocja: I ma ncjahua “Nüm ngü, da tsjifi urrengü pa du eje göhtjo yü nación, da nzojquigö.” Nuquiguejü, xcú cjajpijü úr ngü yü be.—

¹⁸Nu cu maestro cu mí ujti cu cjahni cár ley cu judío, co cu möcja cu mí mandadoju, bi dyødeju nar palabra nü xquí man car Jesús. Bintsjeyajü, cja bi ñajü ja di cjajpijü pa drí möhtiju. Pe mí tzujü pa te di cjajpijü car Jesús, como cu cjahni mí ndo ihtzibiju-ca. Mí ndo dyo í mayu cu cjahni bbü mí dyøjmu te mí man car Jesús, como már ndo zö ca mí ujti. ¹⁹Cja bbü ya xquí nde, car Jesús pé bi bóm pu Jerusalén.

La higuera se seca

²⁰Car jiax ya-cá, bbü mí nxuditjojo, car Jesús pé má hñohui quí möxte, pé má pojmu Jerusalén. Bi tjojmu pu jabu már jø car za gá higo, nxøgue ya xquí dyoti hasta guehpü jáy dyü. ²¹Diguebbü ya car Pedro bi mbení car palabra ca xquí man car Jesús, cja bi xifi:

—Nuque, Maestro, ccahtijma nar za na gó tzani má nde, ya xí dyoti.—

²²Cja bi däh car Jesús, bi xifi:

—Gui hñemejü, rá nzeh ca Ocja.

²³Cierto dí xihquijü, bbü to da hñeme ca Ocja, cja da ne da xij nár ttøø: “Wengua, grí hñenti jar mar,” bbü jin da yomfeni ca xí ma, da ncja-ca, bbü. ²⁴Guejtjo dí xihquijü, bbü gri nzojmu ca Ocja, guí hñemejü, da ddahquijü ca guí

öjpíju. Nubbá, cierto da ddahquijü.

²⁵Cja bbü guí nzojmu ca Ocja, bbü guí mbenijü to te xí cjahquijü, guí perdonabijü, sánta quer Tzi Tajü ca bí bbü jitzi da perdonaquijü hneje. ²⁶Nuquiguejü, bbü jin guí perdonabi quir hñohuijü ca rá ntto ca xí dyøtiquijü, guejti quer Tzi Tajü ca bí bbü jitzi jin da perdonaquijü ca rá ntto ca xcú dyotijü.—

La autoridad de Jesús

²⁷Cja diguebbü ya, car Jesús pé bi ma gó ngojti pu jar jñini Jerusalén. Cja bbü má dyo car Jesús pu jar templo, bú eh cu dda möcja cu mí mandado, co dda cu maestro cu mí ujti cu cjahni car ley. Mbá yojmu cu dda tita cu mí ja úr cargoju jar templo hneje. ²⁸Guegue-cu bi dyón car Jesús:

—¿Jabu xcú jña quer cargo pa gui mandado hua? ¿Tocä xí ddahqui quer cargo pa gui dyoti yü guí òte?—

²⁹Cja car Jesús bi dädi:

—Hñehquiguejü, gu önquijü hnär nttoni. Bbü gui tjajtiguijü, xtá tjajtiquijü hneje.

³⁰Car Juan ca mí xix yü cjahni, cjabu xcuí jña cár cargo pa di xix-yü? ¿Cja xcuí hñeh car Tzi Ta ca bí bbü jar jitzi, cja huá xcuí hñej yü cjahni hua jar jöy? Tjajtiguijü ya.—

³¹Nucá, bi ntzohmi, cja bi mantsjeju:

—Bbu gu majmu, xcuí hñé jitzi, guegue da mam bbü, ¿Dyoca jí xtá emejü? ³²Cja bbü gu majmu, xcuí hñej yü cjahni hua jar jöy, dí tzujü te da cjacuipü yü cjahni.— Como göhtjo cu cjahni mí emejü, cierto

múr jmandadero ca Ocja car Juan.
33 Eso, cu cjahni-cá bi xih car Jesús:
 —Jin dí padije jabu xcuí hñeh car cargo ca mí ja car Juan.—

Diguebbu ya, pé bi dajti car Jesús, bi xijmu:

—Hnequigö, jin gu xihquiju jabu xcuá hñeh cam cargo dí jagö pa gu öti yu dí øte.—

El ejemplo de los trabajadores malvados

12 Diguebbu ya car Jesús pé bi mudi bi ujti cu cjahni, bi nzofo gá bbede. Bi ma:

—Mí bbuh hnár hñojø, bi jojqui hnár huerta gá uva, cja bi hñiti hnár cerca göhtjo jáy nttzani. Bi dyoti hnár tanque pu jabu di ddin cu uva, cja bi jiø hnár ntorre pa di tjanti car huerta. Diguebbu bi döjti car huerta cu dda mefi, cja guegue bi ma yapu, pe hnár jöy. **2**Bbu ya xquí zóh car tiempo pa di dá cu uva, car hñojø bù pejni hnár muzo pu jabu már bbuh cu mefi. Bú eh car muzo pa di dyöh cu uva cu mí tocabi, pa pé drí dtzi. **3**Nu cu mefi bi pentiju car muzo, bi uniju, cja bi gupju. Jin te gá ndux car muzo. **4**Diguebbu ya, car jmu pé bù cuh hnár muzo. Nucá, bbu mí zóh pu jabu már bbuh cu mefi, bi tjøjti medo, bi mfehtibi cár ña. Göhtjo te bi tsjifi, cja diguebbu ya, pé bi cjuy. **5**Car jmu pé bi yojpi bù cu pé hnara. Nucá, bbu pé mí zóm pu jabu már bbuh cu mefi, bi zeti-cá, bi möhtiju. Diguebbu ya car jmu pé bù pejni pé dda jmandadero rá ngu. Nu cu mefi bi ncjadiju pu. Bi uniju cu ddáa, nu cu pé ddáa bi möhtiju.

6Car jmu ya xquí guy göhtjo quí mefi, pe mí hñih hnár ttu cja mí

ndo mah-cá. Gá ngatzi bù pejni-cá pu jabu már bbuh quí mefi. Ngá ma guegue: “Ndejmu da ttihtzibi num ttu.” **7**Pe guegue ya cu mefi bi majmu: “Guejnu da ttzoquibi göhtjo nar huerta. Gu mföixu ya, gu pohtiju pa gu cojmu yu di ttuni guegue.” **8**Eso, bi pentiju cár ttu car jmu, bi möhtiju, cja bi dyejmu yapu cár cuerpo.

9Diguebbu ya, car Jesús bi dyön cu to már øde:

—Xi ca to ár mejti car huerta, ¿te da cjajpi cu mefi-cá? Du eje da möhti, cja da döjti pé hnahno mefi car huerta.

10Nuqueju, cja jí xquí ccahtiju nar palabra na i jux pu jar Escritura? I ina:

Car medo ca bi dyendi cu cjahni cu mí jøh car ngu,
 Guehcá xí cjöix pu jar esquina car ngu, pu jabu i penti cu cjoti.

11Guejtsje ca Ocja xí mandado xí cjöix pu.

Nugóju, bbu dí ccahtiju, i ndo dyo um mayju.—

12Cu cjahni cu mí tsiju nar bbede-ná, bi badiju car Jesús már na di guegueju, már jequi cu mefi cu már nttzo. Cja bi jioniju ja drí zdiju car Jesús. Pe mí tzuju cu cjahni rá ngu cu mí teniju car Jesús. Eso, bi jiejtiju car Jesús, bi möjmu.

El asunto de los impuestos

13Diguebbu ya, cu cjahni-cá, bù cujmu cu dda fariseo co dda cu hñojø cu mí teniju car rey Herodes pa di dyøhtibiju prueba car Jesús, xajma di cajpju di ma hnár palabra ca jin di tzö. **14**Bú ejmu ya guegueju, cja bi xijmu car Jesús:

—Nuquigue, Maestro, dí padije, guí mangue ca ncujuaní. Jin to guí tzu, cja jin to guí johtitjo, como jin guí ccáhtigue nár cjahni xózetzjo, pe guí xifi göhtjo yu cjahni parejo, te i ne ca Ocja. Gui xijquije tzuya, ¿cja rá zö ca dár unije cù contribución car rey romano ca i mandadoguijü, cja huá jin guí tzö? ¹⁵ ¿Cja gu cjuáti, o ya jin gu cjuáti?—

Nu car Jesús bi bádi, már øhtibitijoü hnar trampa, cja bi däh, bbü:

—¿Dyoca guí øjtiguijü ntjöti? Bú janquijü hnar domi hua, pa gu ccahtijü.—

¹⁶Cja bú tjä hnar domi, bbü. Diguebbü ya car Jesús bi hñöni:

—¿To úr retrato ná i cuati hua, cja to úr tjuyü-na?—

Gueguejü ya bi xijmu:

—Í mejti car rey César.—

¹⁷Bi daj ya car Jesús, bi xijmu:

—Gui unijü car rey yí mejti guegue, cja guejti ca Ocja, gui unijü quí mejti-ca hneje.—

Nu cù hñöjö-cü, bbü mí dyøde ja ncja gá ndah car Jesús, bi ndo hño í møyüü, bbü.

La pregunta sobre la resurrección

¹⁸Diguebbü ya, bú eh cù dda saduceo pü jabü már bbuh car Jesús. Cù saduceo i majmu, jin da jña úr jña cù ánima. Bbü ga ndü yu cjahni, i mpuntjo, göhtjo co quí tzi møyü. Ncjapü ga majmu. Gueguejü bi dyönijü car Jesús, ¿cja ntjumüy da nantzi cù ánima? Bi hñimbijü:

¹⁹—Nuquigue, Maestro, ca ndor Moisés bi zoguijü nár palabra-na: Bbü da du hnar hñöjö, cja jin tema

bajtzi di hñiji, cár cjuáda car ánima da yojmi cár bbejpo pa da hñi bajtzi. Cja bbü da ønte car bbejñä, car bajtzi ca da hmüy, da tsjifi dür bajtzi car ánima, pa ncjapü jin da mpun cár tjuyü car ánima. ²⁰Mí bbü yojto hñöjö cù mí ncjuada. Car dacjuáda bi ntajiti cja bi hmübi cár bbejñä. Diguebbü ya, bi du, jin tema bajtzi gá nzogui. ²¹Diguebbü ya car yocjuáda ya, pé bi yojmi cár bbejpo, cja guegue pé bi dutjo. Guejto jin tema bajtzi gá nzogui. Ca rá jñu ya, pé bi ncjadipü hneje. ²²Cja göhtjo cù yojto hñöjö bi hmübi car bbejñä, göhtjo bi ncjadipü pü. Jin tema bajtzi gá nzoguijü. Gá ngax ya, bi du car bbejñä hneje. ²³Xijquije ya bbü, car pa ca da jña úr jña cù ánima, ¿tocä dür bbejñä guegue, como bi yojmi göhtjo cù yojto cjuáda?—

²⁴Diguebbü ya bi däh car Jesús, bi ma:

—Nuquejü, xcú ndo nquivocajü porque jin guí pajmu te i man cù Escritura. Guejto jin guí emejü ¿cja rá nzedi ca Ocja? ²⁵Bbü pé xta jña úr jña cù cjahni cù xí ndü, ya jín da ntajiti. Da hmüpü ncja ngü cù ángele cù bí bbü jar jitzi. ²⁶Nu cù cjahni cù xí ndü, ndejmá da jña úr jña-cú. ¿Dyoca jin guí emejü-cá? ¿Cja jin guí ccahtijü car libro ca bi dyoti car Moisés? ¿Cja jin guí ccahtijü te bi man ca Ocja bbü mí ntjehui car Moisés pü jar za gá hmíni? Bi ma ncjahua: “Nugö, úr Cjáa-guigö ca ndor Abraham, cja co ca ndor Isaac, cja co ca ndor Jacobo.” ²⁷Guegue jí úr Cjáa cù cjahni cù ya jin te i bbü úr nzajqui. úr Cjáa cù cjahni cù i ejadi úr

nzajqui, masque ya xí ndu, como guegue i ungui nzajqui cu to i eme. Nuquigueju, jin guí padiju ja i ncja ca Ocja. Jin gui tzö quir mfeniju.—

El mandamiento más importante

28 Guejtjo bi guati pu hnar maestro ca mí ujti cu cjahni car ley. Guegue bi dyode te már man car Jesús co cu saduceo. Bi badi, már ndo zö car palabra ca bi däh car Jesús. Eso, bi guati jabu már bbuh-ca, bi dyöni:

—Nuque, Maestro, digue cu ddetta mandamiento cu bi zoguiju car Moisés, éja ndrá nguehcä más i nesta da ttójte?—

29 Cja car Jesús bi dädi:

—Gue nár mandamiento na i ma: “Guí dyodejü, guí cjahni israelitaju: ca Ocja, um Tzi Jmugöju, ddatstsje-ca. Gu emejü jøntsje-ca. **30** Gu neju ca Ocja, cam Tzi Jmuju, göhtjo mbo um tzi muyju. Gu ihtzibiju-ca, gu mbenijü, cja gu jonijü göhtjo co cam ttzedijü.” Nur mandamiento-nu más i muhui ni ndra ngue cu pé ddaa. **31** Guejti car mandamiento ca i ntendihui, guejtjo i ndo muhui. Gue nu pé hnaa nu i ma: “Gu neju göhtjo tema cjahni ncja ngu dar netsjeju.” Yu yojo mandamiento-yu, más i nesta da ttójte ni ndra ngue cu pé ddaa.—

32 Diguebbu ya, bi däh car maestro-ca:

—Ciento nur palabra nu xcú ma, Maestro. Ddatsje ca Ocja, ujto pé hnaa. Jøntsje guegue um Jmugöju ca dí emejü. **33** Bbu gu neju guegue göhtjo mbo um tzi muyju, bbu gu ihtzibiju, cja gu mbenijü, cja gu jonijü, göhtjo co

cam ttzedijü, guejtjo bbu gu ne cum minga-cjahni ju ncja ngu dar netsjeju, guehcä i ndo muhui-ca. Guehcä i ndo tzoh ca Ocja, cja jin tza i tzoh cu ofrenda cu dí döjtijü cja co cu zuwe rá ngu cu i bböhti cja i dduti pu jar altar.— Ncjanu gá man car hnöjö-ca.

34 Nu car Jesús, bbu mí dyoj ya nur palabra-nu, bi badi, már nzeh cár mfeni car maestro-ca, cja bi xifi:

—Nuque, ya tchutjo i bbödi pa gui cuati pu jár dye ca Ocja, pa da mandadoqui.—

Nu cu pé dda cjahni, bbu mí dyoj nur palabra-nu, ya jin to gá nzö úr may di dyön car Jesús pé dda nttoni.

¿De quién es hijo el Cristo?

35 Car Jesús már ujti cu cjahni jar templo, cja guegue bi dyöni hnar nttoni cu cjahni cu már bbu pu. Bi ma:

—Yu maestro yu i ujiquijü car ley, i majmu, dür mboxibbejto car David car Cristo ca da hnix ca Ocja pa da mandadoquijü. ¿Dyocä i majmu ncjapu? **36** Como guejtsje car David bi ña pu jar salmo digue car hnöjö ca di hnix ca Ocja pa di mandado. Car Espíritu Santo bi möx car David, cja nuca bi ma ncjahuha:

Car Tzi Ta jitzi bi xih cam Tzi Jmugö, bi hnimbí:

“Guí mijcua jam jogui dye gu mföxihi gu mandadohui, Hasta bbu xtá cjajpigö quir contra du eje, Da ndandiñajmu jer tzi huá, cja nuquigue, xquí mandadobi-cá.”

Ncjapu ga man car salmo.

³⁷ Nuquigueju, xijquiju ya, bbu jøntjo dur mboxibbejto car David car Cristo ca di hñeje, cdyoca i tsjifi úr jmu car David, bbu?— Cja jin to gá ndaj nur nttoni-nu.

Már ndo ngu cu cjahni cu mí ujtí car Jesús, cja mí ndo tzójmu ca mí ma.

Jesús acusa a los maestros de la ley

³⁸ Car Jesús már ujtí cu cjahni, cja bi xijmu:

— Gui jnaju ur huenda digue cu maestro cu i ujtilquiju car ley, pa jin gui teniju-cu. Guegueju i jeju quí dajtu rá ma, pa más da ttihtzibi, cja i ne pa da ttzenguaju rá zö jar töy. ³⁹ Guejtjo, bbu i pa jar templo, i ne da mipju pu jabu da ccahti cu pe dda cjahni, cja bbu i pa ja mbaxcjua, i ne da mipju pu jabu da ttihtzibi, hneje. ⁴⁰ Cu maestro-cu, jin gui juijqui cu ddanchu masque jin te i ja-cu. Nu cu to i tujpi domi, cu jin gui tzö da guhti, cu maestro i fongui jáy nguju, i recogebi, cja i jaxti car domi. Diguebbu ya, i pöjmu tsjödi, i ötiju oración rá ndo ma. Ncöni, i ndo joniju ca Ocja. Nu ca Ocja da un cár castigo más drá ngu cu maestro-cu ni ndra ngue cu tzi cjahni cu jin tza i padi te i man car ley.—

La ofrenda de la viuda pobre

⁴¹ Ca hnajpa, car Jesús bi mi jöy, mir nccathihui car caja pu jabu mí ttzoh cu ofrenda, bi ccahti cu cjahni már uti quí domi pu jar caja. Mbá eh cu rico, mí utiju domi rá ngu. ⁴² Diguebbu ya, bú eh hnar ddanchu, jin te mí ja. Bi dyuti pu

yojo tzi domi cu di muhui ngu cutta centavo. ⁴³ Cja car Jesús bi nzoh quí möxte, bi xijmu:

— Dí xihquiju cierto, más i muhui yu tzi cutta yu xí dyuti nur ddanchu-nu ni ndra ngue car domi rá ngu ca xí dyuti yu rico. ⁴⁴ Como göhtjo yu dda cjahni xí undi car domi ca jí mí nestaju. Nu nur tzi ddanchu nu jin te i ja, xí dyuti göhtjo ca mí pehtzi pa di zi.—

Jesús dice que el templo será destruido

13 Diguebbu ya, car Jesús co quí möxte bi boniju jar templo. Nu ca hnaa digue quí möxte bi xifi, inqa:

— Nuquigue, Maestro, ccahtijma yu ndo medo co yu ndo ngu-yu. Rá ndo zö ga nigui-yu.—

² Bi daj ya car Jesús, bi xifi:

— Ciento, guí ccahti yu ndo ngu yu i jojcua. Pe ya xpa eh car pa bbu ya jin da gojcua yojo medo di mfitzi. Como du eh cam contraju, tje da yohti yu edificio-yu, cja da mfonti göhtjo yu ndo medo.—

Señales antes del fin

³ Diguebbu ya, car Jesús bi marjar tto ca mí tsjifi Olivos, cja bú mih pu jabu mir jnantihui car ndo templo. Car Pedro co car Juan co car Andrés bi guati pu jabu már ju car Jesús. Mí ddatsje-ca, cja guegueju bi dyöniju:

⁴ — Xijquije tzu, cincejahmu da ncja cu xcu man? ¿Ter beh caq da ncja pa gár padije bbu ya xta zuh cu pacu?—

⁵ Diguebbu ya, car Jesús bi mudi bi xih quí möxte göhtjo ja da ncja bbu xta guaj nur mundo. Bi xijmu:

—Qui jñaj ur huenda pa jin to da jiöhquij. ⁶Como xtu e rá ng cjahni, xta nn cam tjujugö, xta xihquij: “Guejquigö dûr Cristo, xí hñixquigö ca Ocja.” Cja rá ng cjahni da hñeme ca da man-c.

⁷Nuquiguej, bb xtí dyødej, ya xná ntujni c cjahni c rá bb hnahño lugar, o guejtjo bb xtí dyødej, ya xpa eh car guerra, dyo guí ntzuj, porque ndejm i nesta da ncja-c, ante que da guaj nr mundo. Bb xta ncja-cá, da tzi bbejtjo pa da guadi.

⁸Nubbá, hnar nación da xoxihui tujni pe hnar nación. Guejtjo cár gobierno hnar jöy da ntujnihui cár mínga-gobiernohui, hnahño ur jöy. Cja da ndo hñó hñamijöy. Cja da ujtjo car semilla, rá ng lugar, eso da ndo duntj c cjahni. Da mpejni c cjahni, da fongui c to i mandado. Bb xta ncja y cosa-y, ya xqui tchutjo pa da guaj nr mundo. Pe más da ndo sufri c cjahni bb xta ncja c pé dda cosa c ba bbefa.

⁹Nuquiguej, gui jñaj ur huenda. Porque da ndöquij jár dye c to i mandado, cja da tjupiquij jáy nicja c judio. Guejtjo da ttzixquij, gui ma grí hmopj p jab i bbah c gobernador cja co c rey. Da ttzojnquij porque guí tenguigöj, cja da ttönquij ja i ncja ca guí emeju.

¹⁰Pe jin da guaj nr mundo hasta bb ya xtrú tsjifi göhtjo c cjahni ja i ncja nr nzajqui ca jin da tjegue, cja diguebb ya, da guah bbá.

¹¹Cja bb xta ttzixquij p jab i bbah c autoridad cja da ndöquij jáy dye, jin gui ma gui ntzohmij bbeto te qui xijmu-c.

Hasta car hora ca

xta ttzojniquij cja da ttönquij nttöni, hasta guebb da tsjihquij te grí tjadiju. Nubbá, gui majmu ca da xihquij ca Ocja, como jin gui guehquiguej qui ñaj. Gue car Tzi Espíritu Santo da xihquij ter beh c gui majmu.

¹²Cu pa-c, hnar hñoj da dö cár cjuad pa da bböhti, cja pe hnar hñoj da dö cár tt ca i emegui. Da bböhti-cá por rá nguejquigö. Cja pe dda hñoj ya, da ntujnihui qui taj por rá nguejquigö, da möhti-c.

¹³Nuquiguej, nduntj cjahni da uquij porque guí tenguigöj. Nu ca to da segue da denguigö hasta xtrí gax c pa-c, da mehtzi car nzajqui ca jin da tjegue.

¹⁴Nubbá, gui ma gui ccahtij, da ncja ca bi man car profeta Daniel. Mí ma guegue, du eh ca hnar cjahni, da ttzombi cár templo ca Ocja. Car cjahni-cá, da ñuti p mbo car templo p jab jin gui tjegui to da ñuti, cja da dyoti ca jí rí ntzöhui. (Bb xquí ccahti nar palabra-na, gui jioni ja grí ntiente.) Cja bb xtí ccahtij ya xtrú ncja-cá, gui jñaj ur huenda. Cu cjahni c i bbah jar estado Judea, da guj ur ddiji, da ma ja tto.

¹⁵Bb to di bbah p jár ñajc cár ng, du c nttzedi cja da ddagui hneje. Ya jin da ñuti p mbo cár ng pa da gujqui qui mejti.

¹⁶Bb to di hñó jar juaj, guejtjo da ddajtjo, ya jin du coh p jár ng pa da gax ca da möti.

¹⁷Juiji c bbejñ c di hñ, c pa-c, co c bbejñ c di tje qui tzi bajtzi, di tzuji, como da ndo sufri gueguej.

¹⁸Nuquej, gui dyoppij ca Ocja pa jin da ncja y cosa-y c zan rá ntze.

¹⁹Como bb xta ncja y xtí xihquij, da

ndo sufri cu cjahni. Nunca xtú nú cu cjahni car sufrimiento ca di jñejmi-cá, desde bbu mí ttóti nr jöy hasta car pa-cá. Nttzeditjo da sufri-cá. ²⁰Tanto da sufri cu cjahni cu pa-cá, tje di duju, bbu jin di man ca Ocja da hna nttzedi pu car sufrimiento. Nu ca Ocja, como i mbéndi cu cjahni cu xí cjajpi í mejt*i*, xta mandado pa da hna nttzedi pu car sufrimiento-ca.

²¹Cu pa-cá, bbu to da xihquiju: “Jantijmaju, rá bbuj nu rá cjanu car Cristo ca xí hnix ca Ocja,” cja huá bbu da xihquiju: “Ccahtijmaju, rá bbujcua guegue” nuqueju, jin gui hnéeju. ²²Como cu pa-cá, da hño jiöyte rá ngu, da nzoh cu cjahni, da xijmu: “Guejquigö dúr Cristo, xí hnixquigö ca Ocja.” Guejto da hño jiöyte profeta. Nucá, da dyöti milagro co maravilla gá ntjöti pa da ttéme. Da jioniju ja drí jiötiju göhtjo cu cjahni. Hasta quí cjahni ca Ocja, cu xí juajnitsje, da jioni ja drí jiötiju hneje. ²³Nuqueju, gui mfödiju, cja jin gui hnemaju-cá. Ya xtú xihquiju te da ncja, pa bbu xta ncja, ya xquir padiju.

Cómo vendrá el Hijo del Hombre

²⁴Nu cu pa-cá, bbu ya xtrú tjoh car sufrimiento ca xtú xihquiju, nr jiadi xta hmexuy, cja nr zana jin da nzø. ²⁵Guejti yu tzø xta jiøh pu jar jitzi, cja göhtjo yu te bí bbuj nu jitzi da ndo juantsje. ²⁶Diguebbu ya, pé xcuá eco, cu cjahni da jiantigui, ya xtrá e já guy, xcuá ja cam cargo cja co cam ttzedi pa gu mandado, cja da ttizquigö. Guejquigö, dúr cjahni, xpá bbenqui hua jar jöy. ²⁷Car pa-cá, xtá cujcö cm ángele,

da hñoju göhtjo nr jöy co göhtjo nr jitzi, da jmuntziju göhtjo cu cjahni cu xí hneme ca Ocja. Du tzí-cá desde pu jar norte, co pu jar sur, co pu jabu rí bøxi jiadi, co pu jabu rí ñuy. Nu cm ángele da zotiju pu jabu rá cca nr jitzi, da jmuntzi göhtjo cu cjahni cu xí hneme ca Ocja, cja du tziju.

²⁸Nuya, gui mbéniju ja i ncja car za gá higo. Bbu ya xí tuhmi quí dye cja ya xqui ddoh quí xi, nubbá, xqui padiju, ya xta máh cu zana rá mpa.

²⁹Ncjad u hneje da jogui gui padiju, bbu xta záh cu cosa-cá, ya xqui tchadipu da guaj nr mundo. Bbu xta ncja cu xtú xihquiju, ya xqui guejtipu. ³⁰Dí xihquiju ntjumu, jin da mpun yu cjahni yu i bbujcua hasta bbu ya xtrú nzudi göhtjo yu te xtú xihquiju. ³¹Da mpun nr jitzi co nr jöy. Nu yu palabra yu dí mangö, jin da mpun-yá. Göhtjo da ncumpli.

³²Pe jin to i pádi mero ncjahmu da záh car pa-cá, o tema hora da ncja. Jin gui páh cu ángele cu bí bbu jitzi, ni diguejquigö, úr Ttugui ca Ocja, jí bbe dí pádi hneje. Jontsje cam Tzi Ta ca bí bbu jitzi, bí páh-cá.

³³Nuquigueju, gui jñaju ur huenda, dyo guí dabéniju. Gui tóhmiu car pa-cá, cja gui dyöppiju ca Ocja da móxquiju, como jin gui padiju ncjahmu da záh car pa-cá.

³⁴Nugö, xcuá hna etjo, ncja hná hñojø ca ya xí mbøm páur ngu, xí ma yapu. Ante que di ma, bi döjt*i* cár cargo cu muzo, cada hnaa cár bbuefi. Guejto xí bbejpi car portero da mföh pu jar goxtji, xí xifi jin da aja. ³⁵Hnequigö, dí ncja ngu car

mingu ca bi bøni. Dí xihquijü hneje, gui tzödijü, gui tøbiguijü, como jin guí padijü ncjahmü xtá hna tzøjø, nuguigö, ir jmuguiögöjü. Jin guí padijü, cja xcuá ęcö ya xtúr nde, o madé ur xuy, o bbü xta mah car ndøxca, o bbü nxuditjojo? ³⁶ Gui tøhmijü, bbü, pa bbü xtá hna tzøcö, jin gu tøhquijü gri ajmü. ³⁷ Cja yü palabra yü xtú xihquijü, dí xifi göhtjo cu to i ne da dengui: Gui tzödijü, cja gui tøbiguijü.—

Conspiración para prender a Jesús

14 Mí bbejti yojpa pa di zøh car mbaxcjua ca mí tsjifi ur Pascua, bbü mí tzijü car tjujme ca jin te mí yojmi levadura. Nubbá, cu möcja cu mí mandado co cu maestro cu mí ujti cu cjahni car ley, bi mpeguijü, mí jonijü ja drí dyøhtibijü car Jesús hnar trampa pa di zudijü cja di möhtijü. ² Pe mí majmu:

—Jin gu pöhtijü yü pa ya i cja mbaxcjua, pa jin te da cjaguijü yü cjahni.—

Una mujer unge a Jesús

³ Nu car Jesús mí bbuh pu Betania, pu jár ngu hnar hñøjø ca mí tsjifi mûr Simón. Nucá, xquí tzöhui car jñini lepra. Car Jesús már juh pu jar mexa pu jabü már tzijü. Cja bú eh hnar bbejñä, mbá tû hnar botella már tzi zö, mí po hnar perfume ca már ndo mädi cja mí yuni rá tzi ncuji. Car bbejñä bi wajqui car botella, bi xihtzibi car perfume jár ñä car Jesús. ⁴ Már bbuh pu cu dda cjahni cu bi ntsjeyejü, bi majmu:

—Jiøjquitjo nur perfume nu xí fön nur bbejñä-nü. Már ndo mädi, cja

xí bbejtjo. ¿Dyocä xí dyøte ncjanü?

⁵ Bbü di bbö, di tjo tresciento denario car domi di nccuhti, cja di jogui di ttun car domi cu tzi probe.— Ncjapü gá män cu cjahni, ngá nzohmijü car bbejñä.

⁶ Nu car Jesús bi xih-cá:

—Gui jieguijü-nü. Dyo te guí xijmü. Rá zö ca xí dyøjtiguigö-nü.

⁷ Göhtjo ur pa guí bbüpju cu tzi probe cu jin te i ja. Göhtjo tema pá da jogui gui föxjü-cá. Nuguigö, jin gu hmüpju göhtjo ur tiempo. ⁸ Nur bbejña xí dyøjtigui göhtjo ca mí tzö mbo úr may. Xí xizqui nar perfume nám ndodyo, ncjahmü gá hñögui, masque jim be dí tu. ⁹ Dí xihquijü ncjuani, göhtjo pu jabü da jma nar tzi ddadyo jña, göhtjo cu lugar hua jar jöy, guejtjo hneje da jman ca xí dyoti nur bbejña-nü, pa da feni guegue.—

Judas traiciona a Jesús

¹⁰ Diguebbü ya, car Judas Iscariote, hná digue cu doce hñøjø cu mí ntzixihui car Jesús, bi ma pu jabü már bbuh cu möcja cu mí mandado, bi xijmü:

—Nugö, bbü gui cjuitiguijü, xtá döquijü car Jesús.— ¹¹ Cja bi ndo mpöh cu möcja, bbü, bi xijmü car Judas tengü di guhtijü bbü di dö car Jesús. Bbü ya xquí gojmü acuerdo, pé bi ma car Judas, bbü, cja desde guebbü, bi jioni ja drí dö car Jesús.

La Cena del Señor

¹² Car primero car pa ca mí tzijü cu tjujme cu jin te mí yojmi levadura, bbü mí pöhtijü cu tzi deti gá mbaxcjua, quí möxte car Jesús bi dyönijü-cá:

—¿Jabu guí ne grá möjme gu joquije pa gu tzöju car mbaxcjua?—

¹³Guegue ya bi gu yojo quí möxte, bi xijmi:

—Gui mehui pu jar ciudad, xquí ntjeju hnar hñojø ba tu hnar xóni i po dejé. Gui tenihui car hñojø-cá,

¹⁴cja pu jabu da ñuti, gui ctihui hneje, cja gui xijmi car mingu: “I man cam maestroje, ina: ¿Jabu i bbuh car cuarto pu jabu gu tzi car jñuni gá mbaxcjua, nugö co yu hñojø yu dí yobbe?” ¹⁵Nubbu, car mingu xta ujtiquihui hnar cuarto rá nojo, bí bbuh pu ñqa. Ya xná bbuh pu göhtjo ca te gu nestaju. Guehpu jar cuarto-cá gui joquihui pa gu tzöju car mbaxcjua.— ¹⁶Bi ma cu yojo quí möxte, bbu, gá nzojmi jar ciudad, bi döti göhtjo ncja ngu gá tsijimi, cja bi joquihui ca mí nesta pa di zöju car mbaxcjua.

¹⁷Mí zóh car nde-cá, car Jesús bi mehui cu doce quí möxte, cja bi zoniju pu jabu xquí tjojqui. ¹⁸Cja bi mipju pu jar mexa, bi mudi bi zijuu. Bu már tziju, bi man car Jesús:

—Dí göhtjoju dár tziju hua, pe i bbuhquigueju ca hnaa ca da döguigö.—

¹⁹Diguebbu ya, quí möxte car Jesús bi mudi bi jmiduju, cja mí majmu ngu-hna ngu-hna, mí öníju car Jesús:

—¿Cja guejquigö gua otigö-cá?, ¿Cja guejquigö?—

²⁰Diguebbu ya, car Jesús pé bi dadi:

—Hnaa diguehqueju, guí doce um mötequiju, xta dyötigui ncjapu. Guegue ra tjuhmi cár tjujme hnaadi nár moji hua dár tjuhmi cam tjujmegö hneje. ²¹Cierto, ya

xí man ca Ocja i nesta gu tu, ncja ngu ga mam pu jar Escritura, como guejquigö dür cjahni xpá bbenqui hua jar jöy. Pe ndejmá dí ndo jujjqui car hñojø ca da döguigö jáy dye cu cjahni cu da möjtigui. Más di joh bbu jin di hmuh car hñojø-ca.—

²²Már juju jar mexa, már tziju, cja car Jesús bi jñá hnar tjujme, bi dyöjpí ca Ocja di bendeci. Diguebbu ya, bi xejqui, cja bi un quí möxte hna-hná r tzi pedazo. Bi xijmu:

—Gui jñagueju, cja gui tziju. Nar tjujme-ná, um cuerpopö.—

²³Diguebbu ya, bi duu car vaso, cja guejtjo bi dyöjpí mpöjcje ca Ocja por rá ngue car vino. Ma ya bi uni hna-hna quí möxte, cja cada hnaa bi zi hna tzi tujqui ur vino.

²⁴Nubbu, bi xijmu:

—Nar vino-ná, gue cam cji bbu xta mföni. Bu xta ncja-ca, xta ttoti hnar ddadyo acuerdo pa yu cjahni rá ngu, pa santa da döti car nzajqui ca jin da tjegue. ²⁵Dí xihquiju nejuani, ya jin gu yojpi gu tzigö vino hasta car pá bbu xtá fudi xtá mandadogöbbe co cam Tzi Ta. Nubbu, cja xtá tzigöju car ddadyo vino pu jabu i mandado ca Ocja.—

Jesús anuncia que Pedro lo negará

²⁶Diguebbu ya, car Jesús, yojmi quí möxte, bi xödiju hnar tsjödi, cja bi boniju gá möjmu jar ttoØ ca mí tsjifi Olivos. ²⁷Nubbu, car Jesús bi xih quí möxte:

—Göhtjoquigueju, gui ma gui wembiguiju rá nxunya, como ngu ga mam pu jar Escritura. I ma ncjahua: “Da bböhti car mödi, cja tje da mfonti cu dejti.” ²⁸Pe bbu ya

xcrú nantzigö, gu hmeto, pe gráma pü Galilea, cja nuquiguejü, xquí tenguiju xcrí ntjeju pü.—

²⁹Diguebbü, car Pedro bi xih car Jesús:

—Masque da wembiqui göhtjo yü ddáa, pe nugö, jin gu wembiqui.—

³⁰Nu car Jesús bi xifi:

—Dí xihqui ntjumü, nuquigue, nuya rá nxunya, ante que da mah car ndøxca yo vez, xquí cøngui jñu vez, xquí ma jin guí meyagui.—

³¹Nubbü, bi zötí úr møy car Pedro, cja bi dadi nzajqui:

—¡Jinä! Masque i nesta gu tuhui, nim pa gu cønqui ca dár meyaqui.—

Diguebbü ya göhtjo cü dda quí möxte bi mandijü ncjapü hneje.

Jesús ora en Getsemaní

³²Ma ya bi zötijü hnar huerto ca mí tsjifi Getsemaní. Cja car Jesús bi xih quí möxte, bbü:

—Gui mipjü hua, gár magö nu rá cjanü, gu ma nzoh ca Ocja.—

³³Cja guegue bi zix car Pedro co car Jacobo co car Juan, bi ma nu rá tzi cjanü, nu car Jesús bi mädi bi ndo ntzøte cja bi jmídu rá ngu. ³⁴Cja bi xih cü jñu quí möxte cü xquí zitzí:

—I ndo jmídu núm tzi møy, ya xtá tu. Nuquejü, gui tóhmijü hua, gui tzödijü.—

³⁵Cja guegue pé bi ma tzi yanü, cja bi hmefo jar jöy, bi nzoh ca Ocja. Bi dyöjpi cja jin di jogui di guhtzibi ca mír nesta di du? ³⁶Bi ma:

—Nuquigue, üm Tzi Taqui, guí padi ja gui cjajpi göhtjo yü cosa. Gui cjuzqui tzu nur prueba-nü. Pe ndejma, jin da ttoti ca dí negö. Da ttoti ca guí negue.—

³⁷Diguebbü ya, bú coh pü jabü már bbüh cü jñu quí möxte, már ah-cá. Cja car Jesús bi xih car Pedro:

—Nuque, Simón, cja gár aque hneje? Cja jí mí tzö güi tzödigue, mädi hna hora? ³⁸Gui tzödijü cja gui nzojmü ca Ocja, pa bbü xta zahquijü hnar prueba, jin da dahquijü. Mbo ir møyju, guí ne gui dyotijü ca rá zö. Nu yir cuerpoju jin gui ne da jiehqui gui tzejtijü prueba.—

³⁹Diguebbü ya, pé bi ma car Jesús, bi ma bú nzoh ca Ocja nu rá cjanü. Cja pé bi yojpi bi män cü palabra cü ya xquí ma. ⁴⁰Cja pé bú coh pü jabü már bbüh quí möxte. Pe bi dötítjo már ah-cá, como mí ndo cädi ttaja quí döjü. Cja bbü mí nzojmü car Jesús, gueguejü jí mí padi te drí dädijü. Car Jesús pe bi ma gá ngoh bbü, pé bú ora. ⁴¹Diguebbü ya, pe hna tzi rato, pé bú eh ca xtrá jñu vez, cja bi xih quí möxte:

—Cja gár atijü? Cja jí xcá jogui güi tzödijü? Ya co guehcá. Jiantijmajü, ya xí nzuh car hora. Ya xta ndöguigö jáy dye yü cjahni yü i ndujpite, guejquigö dür cjahni xpá bbenqui hua jar jöy. ⁴²Gui nantzijü ya, gu möjö. Tji ya-nü, ya xpa ej nu to da döguigö.—

Llevan preso a Jesús

⁴³Bbü már ñädi car Jesús, bi zöh car Judas Iscariote pü jabü már bbü guegue. Car Judas mí yojmähui cü pé dda once quí möxte car Jesús. Guejto pé mbá e pé dda cjahni rá ngu, mbá tenijü car Judas. Mbá cüjü espada, co za. Cü möcjä cü mí mandado co cü maestro cü mí nxöh

car ley, cja co cu tita cu mí pehtzi cár cargoju, göhtjo-cu xcú gujmú cu cjahni rá ngu pa di mfóxijú di zádijú car Jesús. ⁴⁴Car Judas Iscariote ya xquí xih cu pé dda cjahni hnar seña pa drí meyajú toca di pentijú. Guegue xquí ma:
—Car hñøjø ca gu ndane, guehcá gui pentijú, cja jin gui jiejmú da ddagui.—

⁴⁵Cja car Judas, bbu mí zom pu jabu már bbuh car Jesús, bi guati nttzedi, bi zengua, bi xifi:

—Nuquigue, Maestro, ¿cja guí bbujtjo? — Cja bi ndo ndane rá ngu.
⁴⁶Diguebbu ya, cu to mbá yojmi car Judas bi pentijú car Jesús.

⁴⁷Hna cu hñøjø cu mí yojmi car Jesús, bi gux cár espada, bi dyojquibi ca hnár gu hnar muzo ca már bböh pu. Nucá mí pejpi car möcja ca más mí ja cár cargo. ⁴⁸Nu car Jesús bi xih cu cjahni cu xcú hñejé, bi hñimbi:

—¿Dyoca xcú ejmu gui tzajquijú, ncjahmú gur begö, guá cuju espada co za? ⁴⁹Göhtjo ur pa ndár dégö pu jar templo, ndár ujti cu cjahni pú, cja nuquigueju, jin te gú cjaguiju. Cja nuya, ya xcú tzajquijú, pa da zuh ca i mam pu jar Escritura.—

⁵⁰Bbu mí ttzah car Jesús, göhtjo quí möxte bi wembiju, bi ddajmú.

El joven que huyó

⁵¹Guejto már bbuh pu hnar bajtzi hñøjø, mí ten car Jesús hñejé. Jóñá hnar sábana mí pöti-cá. Cu cjahni bi penti-cá hñejé. ⁵²Nucá bi ddagui, bi zoh cár sábana, ya jin te mí je.

Jesús delante de la Junta Suprema

⁵³Nubbú, bi ttzix car Jesús pu jabu már bbuh car möcja ca más mí

pehtzi cár cargo. Cja bi jmuntzijú hñejé göhtjo cu dda möcja cu mí pehtzi cargo, co cu tita, co cu maestro cu mí ujti cu cjahni car ley.

⁵⁴Car Pedro xquí deni yapu, xquí zoti pu jár tji car ngu pu jabu mí bbuh car damöcja. Már juhui cu policía, már pahtiju pu jar tzibi.

⁵⁵Nu cu möcja cu mí mandado, cja co car junta cu tita cu mí pehtzi cargo jár templo cu judio, már jonijú tema cosa rá nttzo xtrú dyoti car Jesús, pa di tjampi ur huenda cja di ttuni sentencia pa drí bböhti. Pe jin gá ndöhtibijú te xtrú dyote. ⁵⁶Már ngu cu jiöyte testigo cu mí xohtzibi bbtjri car Jesús, bi jiöxju ca te xtrú dyoti-ca, pero jin gá ntjehui cu palabra cu mí majmú. ⁵⁷Diguebbu ya, pé bi bböh cu ddaa ya, pé bi xohtzibi pé dda bbtjri guegue, bi majmú:

⁵⁸—Nugöje, dú ójme ngá mä nur cjahni-nu: “Gu yøhti nur templo nu xí dyoti yu cjahni. Diguebbu ca xtrá jñijpa, pé gár xoxcö pé hnaa ca jí xtrú dyoti yu cjahni.”—

⁵⁹Cja guejti cu testigo-cu, jin gá ntjehui ca mí majmú.

⁶⁰Diguebbu ya, car damöcja bi hmöh pu madé cu pé dda möcja co cu tita cu xquí jmuntzi, cja bi dyön car Jesús, bi hñimbi:

—Xiquigue, ¿cja jin guí ne gui tjadi? ¿Cja cierto xcú dyoti cu cosa cu i man yu cjahni-yu?—

⁶¹Nu car Jesús jin te gá ndädi. Ma ya, pé bi dyön car damöcja:

—¿Cja guehquigue, xí hñixqui ca Ocja pa gui mandadoguiye? ¿Cja ur Ttuqui ca Ocja ca rá nttzujpi?—

⁶²Bi daj ya car Jesús, bi xifi:

—Guejquigö. Nuquigueju, xquí jiantiguju bbuh ya xcuá ecö já guy

pu jar jitzi. Guejtjo xquí jiantiguiju, xcár mijcö pu jár jogui dye car Tzi Ta jitzi, xcár mföxicibbe bbu xta mandado. Guejquigö dûr cjahni, xpá bbenquigö hua jar jöy.—

⁶³Diguebbu ya, car damocja bi ndo ntzóte, bi xejqui quí dajtu. Cja bi xih cu ddaa cu már bbu pu:

—¿Dyoca dí jongöju pé dda testigo? ⁶⁴Ya xcú dyódeju te xí manur hñojø-nu. I ne da cjatsje Ocja. Xiqueju, cja ncja guir mbeniju? ¿Te da ncjajpi?—

Cja göhtjo bi dadiju:

—iRÍ ntzöhui da bböhti!—

⁶⁵Cu ddaa cu már bbu pu, bi mudi bi zoxju car Jesús. Bi gojtibiju quí dö, cja bi fójniju. Bi xijmu:

—Paque ya, ¿Toca xí fójnqui?—

Cja guejti cu policia bi mehtibiju cár jmi car Jesús.

Pedro niega conocer a Jesús

⁶⁶Car Pedro már bbu pu jöy, pu jar tji. Cja bú eh ca hnar muza ca mí pejpi car damocja. ⁶⁷Bi jianti car Pedro, már pahti pu jar tzibi, bi judo cja bi xifi:

—Nuquigue, hneje, nguí yojmi car Jesús, car míngu Nazaret.—

⁶⁸Nu car Pedro bi goni, bi ma:

—Jin dí meyagö-cá, cja jin dí ntiendegö ca guí ma.—

Ma ya bi bom pu jar goxtji, cja nubbu, bi mah car ndoxca. ⁶⁹Car muza pé bi ntjehui car Pedro, cja pé bi mudi bi xih cu már bbu pu:

—Guejti-nu, mí ten car Jesús.—

⁷⁰Nu car Pedro pé bi yojpi bi goni. Diguebbu hna tzi rato, cu cjahni cu már bbu pu pé bi xijmu car Pedro:

—Ncuani, nuquigue nguí yojmi quí möxte guegue, como gúr míngu

Galilea hneje. Guí nä ncja ngu ga nä guegueju.—

⁷¹Nubbu, car Pedro bi ndo pura bi goni, cja bi mä nzajqui:

—Dí hñijcö ca Ocja gá testigo, jin dí meyagö car hñojø ca guí majmu. —

⁷²Cja car hora-cá bi mah car ndoxca ca xtrá yo vez. Diguebbu ya, car Pedro bi mben cu palabra cu xquí man car Jesús: “Ante que da mah car ndoxca yo vez, xquí congui jñu vez.” Cja bi ndo nzoni bbu.

Jesús ante Pilato

15 Bu mí nigui ya car jiax-cá, bi jmuntziju cu möcja cu mí mandado, co cu tita cu mí ja cár cargoju jar templo hñeh cu maestro cu mí ujti cu cjahni car ley, cja co göhtjo cu más mí mandado. Bi jmuntzi-cá pa bi majmu te di ncjajpi car Jesús. Guegue-cá bi mandado bi hnuhtibi quí dye car Jesús cja bi ttzix pu jabu már bbu car Pilato, como guegue-cá mür gobernador, cja más már jitzi cár cargo. ²Car Pilato ya bi dyón car Jesús:

—Nuquigue, ¿cja úr reyqui cu judio?—

Bi daj ya car Jesús:

—Guejquigö, ncja ngu guir mä.—

³Nu cu möcja cu mí mandado bi jioxju car Jesús nduntji cosa rá nttzo.

⁴Pé bi yojpi bi dyón car Pilato, bbu:

—¿Cja jin te guí tjajque? Dyójmaja, te tza rá ngu cu cosa i man yu cjahni xcú dyote. —

⁵Nu car Jesús jin te gá ndadi. Eso, bi ndo hñó úr may car Pilato.

Jesús es sentenciado a muerte

⁶Cada ncjeya, bbu mí cja car mbaxcjua-cá, mí tjegui dí bøni libre

hnar preso. Cu cjahni mí juajniju toca di tjegui di boni. ⁷Mí bbuh ca hnar preso, mí ju cár tjuju mûr Barrabás. Guegue mí bbu jar födi co cu dda cjahni xquí mföökju, xquí dyöhtibiju tujni cu autoridad. Xquí möhtiju hnar ánima bbu mär ntujniju. ⁸Nu cu cjahni rá ngu cu xquí jmuntziju, bi guatiju pu jabu mär bbuh car Pilato. Bi mädi bi dyöjpiju car Pilato di tjegui libre hnar preso, como ngu nguá ttote cada ncjeya. ⁹Car Pilato bi dyöni, bbu:

—¿Cja guí neju da tjegui libre nir reyju, nuqueju guí judioju?—

¹⁰Bi dyöni ncjapu car Pilato, como mí padi te rá nguehca xquí ndö car Jesús. Cu möcja cu mí mandado xquí döju porque mí ndo uju. ¹¹Cja nucá bi dyeti cu cjahni rá ngu di xih car Pilato, más mí neju pa di tjegui libre car Barrabás, cja car Jesús di bböhti. ¹²Pé bi dah car Pilato, bi dyön cu cjahni, bbu:

—¿Te guí neju gu cjajpi nur hñøjø nu guí xijmu nir reyju, nuqueju guí judioju?—

¹³Cja cu cjahni pé bi yojpi bi majmu nzajqui:

—iDa ddöti jar ponti!—

¹⁴Car Pilato bi dyöni, bbu:

—¿Ter beh ca rá nttzo xí dyöti-ná?—

Nu guegueju rá ngu vez bi ndo majmu nzajqui:

—iDa ddöti jar ponti!—

¹⁵Diguebbu ya car Pilato bi jiegui libre car Barrabás, como mí ne di pöjpi cu cjahni. Cja bbu ya xquí tjuti car Jesús, bi ndö pa di ttzitzi drí ddöti jar ponti.

¹⁶Diguebbu cu sundado bi zix car Jesús pu jár tji cár palacio

car gobernador. Car lugar-cá, mí tsjifi car Pretorio. Cja bi ttzozni göhtjo car batallón cu sundado, bi jmuntziju. ¹⁷Nubbu, cu sundado bi jejtibiju car Jesús hnar dajtu már ncjüpöy. Cja bi jñuhtzibiju hnar corona gá hmini. ¹⁸Diguebbu ya bi mädi bi burlabitjoju, segue mí majmu:

—iDa ncja úr nzajqui nár rey yu judio!—

¹⁹Mí fehtibiju cár ña co hnar tzi za, cja mí tzoxiju guegue. Cja mí fejtitoju ncjahmu már ihtzibiju, mí cuatiju cja mí ndandíñajmuju pu jáy huá car Jesús. ²⁰Bbu mí guaj ya mí imbjiju, bi ccohtibiju car dajtu már ncjüpöy, cja bi jejtibiju quí dajtutsje guegue. Nubbu, bi guiquiju pu jar jñini, bi dyeniju pu jabu di dötiju jar ponti.

La crucifixión

²¹Cja bbu mír möjmu, bi ntjehui hnar hñøjø ca mbá tjoh pu, mbá e jar campo hnanguadi car ciudad Jerusalén. Guegue mûr Simón, mûr mingu car jöy Cirene. Mûr tahui car Alejandro co car Rufo. Cja cu sundado bi cjajpiju car Simón bi duhtzibi cár ponti car Jesús. ²²Bi zixju car Jesús pu jar lugar ca mí tsjifi Gólgota. Nur tjuju-ná i ne da ma ur lugar gá ximo. ²³Nubbu, cu sundado bi ñahtibiju car Jesús vino ca mí yojmi hnar hñitji pa di tzi meno ca di sufri. Car hñitji-cá mí tsjifi ur mirra. Nu car Jesús jin gá nzi. ²⁴Cu sundado, bbu ya xquí dötiju jar ponti, bi jequbibiju quí dajtu, cja bi dyentziju bolado pa di bädiju tema dajtu di toca cada hnaa, hna-hnár dajtu di gaxju.

²⁵Cja bbu mí ddøti car Jesús pü jar ponti, mí zü jñu hora desde bbu mí bøx car jiadi. ²⁶Cja bi ncuajti hnar seña pü jár ñä car ponti, pü xøtze jár ñä car Jesús. Mí ma ncjahua car seña:

—Gue nár rey yu judio.— ²⁷Guejtjo hneje, bi ddøti já ponti yojo be, hnanguadi pü jabu mí ddøti car Jesús. Ca hnaa gá ddøti pü jár jogui dyé, cja ca hnaa ya pü jár nccuarga. ²⁸Bi ncjapu gá nzuh car palabra ca i mäm pü jar Escritura: “Guegue bi jnu ncja ngu cü cjahni cü i ndujpite.”

²⁹Cja cü cjahni cü má tjom pü, má ntsjundöjü, göhtjo te mí xijmu car Jesús, mí juati quí ñajü cja mí øhtibju burla. Mí xijmu:

—Nuquigue, nguí inä güi yøhti cár templo ca Ocjá, cja diguebbu, jñupja pé güi xotzi. ³⁰Nuya, gui untsjeje quer nzajqui ya, cja gui cajtsje pü jar ponti.—

³¹Guejtjo hneje cü möcja cü mí mandado, co cü maestro cü mí nxöh car ley, mí imbjiju car Jesús, mí ñatsjejü, mí majmu:

—När Jesús, xí uni í nzajqui cü dda cjahni. Nu guejtsje guegue, jin gui tzö da untsje cár nzajqui. ³²iTji när cjahni nu i ma, guegue ur Cristo nu xí hñix ca Ocjá! iTji nu to i ma, guegue um reyju, dí judiojü! Nuya, da gajtsje pü jar ponti, pa gu ccahtijü cja gu emeju, ¿cja ntjumü ca xí ma-nú?—

Guejtjo hneje cü yojo be cü már ddøtihui pü já ponti, hna-hna hnanguadi car Jesús, guejti-cá mí xijmi palabra rá ntzzo.

Muerte de Jesús

³³Bbu mí züh car hora mí madé mpa, bi hmexüy göhtjo när jöy

hasta guebbu mí zu jñu nde. ³⁴Cja bbu mí zu jñu nde, car Jesús bi mafi nzajqui, bi ma:

—Eloi, Eloi, élama sabactani?—

När palabra-ná i ne da ma:

“Nuquigue, um Cjáa Qui, dí nzohqui ya, ¿dyo ya-ca xcú jieguigui?”

³⁵Cja bbu mí dyøh cü dda cjahni cü már bbuh pü, bi majmu:

—iDyøjmajü, i mahti car Elías!—

³⁶Nubbá, ca hnar cjahni ca már bbuh pü, bi gü ur ddiji, bi moh hnar esponja cor vinagre, bi dujti hnar tzi za, cja bi pahtzi pü jár ne car Jesús, pa di zuhtzi. Cja bi majmu:

—Tøhmijü tzu, gu ccahtijü, ¿cja du eñ car Elías da dejqui jar ponti?— Mí majmu ncjapu como mí ñajü, bbu mí mahti ca Ocjá car Jesús, mí ne di nømbi cár tjuju car profeta Elías.

³⁷Nu car Jesús bi zuhtzi car vinagre, cja diguebbu ya, bi mafi nzajqui, bi dñ. ³⁸Bbu mí ncja-cá, bi xeh car cortina ca mí hnax pü mbo car templo. Bi xe madé. Bi mudi bi xeh pü ñä hasta gá nzø jöy. ³⁹Nu car sundado ca mí mandado cü pé ddáa, már bböh pü hnanguadi pü jabu mí ddøti car Jesús. Cja bbu mí ccahti ja gá ndü car Jesús, bi ma guegue:

—När hñøjø-ná cierto mür ttu ca Ocjá.—

⁴⁰Guejtjo hneje már bbuh pü cü dda bbejña, már janti yanu te mí ncja. Már bbuh pü car María Magdalena co ni car María ca mür mehui car José hnëh car Jacobo. Nu car Jacobo-cá mí tsjifi ur tchu. Guejtjo hneje már bbuh pü ca hnar bbejña mí ju cár tjuju mür Salome.

41 Nu cu bbejña-cá, mí teniju car Jesús, xcuí hñeh pu Galilea, cja xquí cjapíju jmandado. Guejtjo hneje már bbuh pu pé dda bbejña rá ngu cu xquí deniju car Jesús bbu mbú pox pu Jerusalén.

Jesús es sepultado

42 Bbu ya xquí nde, cu judio mí mpeguiju, mí joquiju ca te mí nestaju pa car jiax-cá, como mí tzujpiju car pa-cá. **43** Mí bbuh ca hnar hñojo, mí ju car tjuju mûr José. Guegue mûr mingu Arimatea. Mûr tita cja mí pehtzi cár cargo co cu pe dda tita jár templo cu judio, cja mí ttıhtzibi. Guegue mí tóhmi di hñeh car pa bbu xta mandado ca Ocja hua jar jöy. Nur José ddatsje bi ma, bi ñuti pu jabu már bbuh car Pilato, jin te mí tzı. Bi dyödi di ungui ur tsjejqui di mehtzibi cár cuerpo car Jesús. **44** Nu car Pilato bi hñó úr may cja bi hñoni, ¿cja ya xquí du car Jesús? **45** Bi mahti car capitán, bbu, bi dyöni. Nucá bi xifi:

—Jaa, ya xí ndu.—

Diguebbu ya car Pilato bi mandado di ndötji cár cuerpo car Jesús pa di dux car José. **46** Nucá, bi döni hnar sábana, bi ma bú tjejqui cár cuerpo car Jesús pu jar ponti, cja bi möx car sábana. Cja bi göti cár ánima mbo hnar cueva gá médo. Diguebbu ya, bi puntzi hnar ndo medo pu jár goxtji car cueva, gá ngoti. **47** Már bbuh pu car María Magdalena co car María ca mûr me car José. Gueguehui már jantihui bbu mí cjotí cár cuerpo car Jesús pu mbo car cueva.

La resurrección de Jesús

16 Cja bbu ya xquí tjoh car pa ca mí tzöya cu judio, car

María Magdalena co car María ca mûr me car Jacobo, cja hnıeh car Salome, bi döjmu perfume cja bi möjmu pu jar cueva pa di gohtzibiju cár cuerpo car Jesús. Ncjapu nguá cjapí quí ánima jıu cu judio, pa jim pe drí xajtjo. **2**Cu bbejña bi möjmu ndo nxıditjo ca primero ur pa car semana, cja bbu mí zoniju jar cueva, cja mbá pox car jiadi. **3**Má ñatsje cu bbejña, már hñöniju:

—¿Toca da puntziguiju car ndo medo pa da wem pu jár goxtji car cueva?

4Diguebbu ya, bi ccıhtiju, ya xquí mbuntzi car medo, masque már ndo nojo. **5**Cja bi ñutiju mbo car cueva, bi ccıhtiju hnar bajtzi hñojo, már juh pu hnanguadi. Mí je dajtu rá ma cja rá ntaxi. Cja bi ndo mbih cu bbejña. **6**Nu car hñojo bi xijmu:

—Dyo guí ntzuju. Guír hñejmu gui jioniju car Jesús ca mûr mingu Nazaret cja bi ddot*i* pu jar ponti. Nucá ya xí jñıa úr jñıa. Ya jin gui bbujcua. Cıchtijmaju hua jabu bi cjotí cár cuerpo. **7**Nuquigueju, gui möjmu bú xijmu quí möxte co hnıeh car Pedro, ya xí nantzi car Jesús. Guegue ya xí hmeto, ya xí ma pu Galilea. Nuquigueju ya, gui teniju, cja pé xcrí ntjeju guegue pu, como ngu gá xihquiju.—

8Nubbu, cu bbejña bi bóm pu jar cueva, bi ddajmu, como nttzeditjo xquí mbidiju, hasta mí biju. Cjuá mí ntzuju, eso bi möjmu, cja jin to te gá xijmu.

Jesús aparece a María Magdalena

9Car Jesús bi jñıa úr jñıa ca primero ur pa car semana, cja bbueto bi nigui pu jabu már bbuh

car María Magdalena. Nur María Magdalena, máhmeto mí hñohui yojo cū ndají cū jin gui tzö, cja car Jesús xquí fonguibi-cá. ¹⁰Cja nur María, bbu ya xquí ccahti car Jesús, bi ma gá xih quí möxte-cá, como nucu, már jmiduju cja már zoniju. ¹¹Car María bi xijmú, ya xquí jñá úr jñá car Jesús, cja guegue ya xquí nccahtihui. Nu cū möxte, bbu mí dyødejú, jin gá hñemejú.

Jesús aparece a dos de sus discípulos

¹²Cja diguebbu ya, car Jesús pé bi nigui pü jabu má dyo yojo cū hnójø cū xquí dení. Pé hnahnó mír nigui guegue. Cū yojo hnójø mír ma hnar lugar ca mí tzi jñajquihui car ciudad Jerusalén. ¹³Nucú, bbu mí meyahui guegue, bú cjahui úr ddiji, bi ma gá ngojmi Jerusalén, bi xih cū pé dda quí amigo car Jesús. Nu cū pé ddáa, ndejmá jin gá hñemejú, écja cierto xquí jñá úr jñá car Jesús?

Jesús comisiona a los apóstoles

¹⁴Gá ngax ya, car Jesús pé bi nigui pü jabu már bbuh cū once quí möxte, már juju jar mexa. Cja car Jesús bi huenti, como jí mí ne di hñemejú écja cierto xquí jñá úr jñá guegue? Bi xifi már ndo me quí mhyju. ¿Dyoca jí xquí ne xquí hñemejú cū ddaa cū xquí ccahtijú guegue bbu ya xquí jná úr jñá?

¹⁵Diguebbu ya, car Jesús bi xih quí möxte:

—Gui pøníjú, gui hñojú göhtjo nur mundo, cja gui xij nur evangelio göhtjo tema cjahni, göhtjo pü jabu i bbuy. ¹⁶Nu cū cjahni cū da hñemegui cja da xixtje, da döti car nzajqui ca jin da tjegue. Nu cū jin da hñeme, da ttembi car castigo-cá, cja da bbedi. ¹⁷Cja cū cjahni cū to da hñemegui, da ttun cár ttzedi pa da dyoti milagro, pa ncjapu da fadi, cierto car palabra ca ba jajú. Da nømbigui cam tjujugö pa da fonguibi cū cjahni cū ttzondají cū xí nzudi. Guejto da ña hnahnó jñá. ¹⁸Cja bbu di hna zeti hnac ciñia, jin te da cjajpi. Guejto bbu da ttuni jñuni ca di yojmi veneno, jin te da cja. Cja gueguejú da dyux quí dye cū döhtji, cja da zö-cu.—

Jesús sube a los cielos

¹⁹Nubbá, car Tzi Ta Jesús, bbu ya xquí nzoh quí möxte, bi hñih-cu, cja diguebbu bi ttzix pü jitzi. Bi ma guí mihi pü jár jogui dye car Tzi Ta jitzi. ²⁰Nu quí möxte bi bøníjú gá möjmu rá ngü lugar, cja bi xijmú cū cjahni nur tzi jogui jñá. Cja cam Tzi Jmuju Jesús, bi un quí möxte cár ttzedi guegue, bi mótsi pa bi dyotijú milagro, ncja ngü gá xijmú. Ncjapu gá fadi mí cierto car palabra ca mí majmu. Amén.

I ttzedi hua nar libro-ná.